

MUROWE, MWAAHIMEERYE



Okhalela onamoona, ni munna mwamuthiyana ottuli iwe,
kinoona wira eyo ennithoonyerya nsipo nle:

Oh, ophenta wa Muluku, wuulupale ni
wooloka!

Woohithokoseya ni wa ikuru!

Nihiku xeeni nlo wa hiyo. Nrowe voomaaleleya vano, ni
muru ahu wo wuurama, niwiipele nenlo Apwiya vakhani
nihinatthi ovekela. Siiso, Teddy, mwatthuna vale, munivahe
akorte mwaamukhaani. Nto nrowe niipe paahi wi...
nuuramme-ene muru, niphunye maitho, nihinatthi ovekela.

Oh, ophenta wa Muluku, wuulupale ni
wooloka!

Woohiphimeya ni wa ikuru!

Owo mahiku othene... [Nipuro vahiitthu
mufiitani—Mol.]

² Etinta, maasi othene yaathatunwe etinta, ni erimu yothene
khukhala isapala soolempwa, ni khula mutathi mulaponi
mureka, ni khula mutthu namalepa mwa muteko, nnakhala
vo khivaaweryaneya ohimya ophenta wa Muluku wa nloko
n'Atamu nimonre. Hiyo ninnooxukhuruni Nyuwo, Tithi, mwaha
w'Ephome yooreerexa ya Pwiya Yesu, ni mwaha wa voosiis'ule
wa muupuxeryo wo ohihimuwa, ni mwaha wa mphento Anyu wo
ovuluxa omwarenle mmurimani mwahu olelo, ni Eroho Yowarya.
Onniruuha m'opatthanani ni Yoowo, Ole a eMuluku, Mpattuxa.
Oniruuha mwa oxinna, mulaponi, ohinatoko oxinttiwa. Khiivo
emakelo, hata elaihaneryo, yaarowa okhalakhala, eweryaka
olikana ni oxinna wa alopwana n'athiyana ooyariwa vasya. Ni
onrowa okhala nsipo n'atthu oowaarya ni malaikha voohimala!

³ Hiyo ninnivekela olelo wira Nyuwo mureerihe sothene
siniir'ahu niphavelaka wooniherya, oxu—oxukhuru wahu
mmurimani mwahu wa Nyuwo, mwaha wa itthu Nyuwo
sinniirel'anyu. Ni osuwela wira khiyaari mirima s'awiixutti
paahi saahakalalihiwe voosiis'ule, Maria ni Maria Matalena,
masi nave-tho hiyo, awiixutti Anyu olelo, mirima sahu
sinnihakalalihiwa okathi onoon'ahu wira Owo khokhwiye, masi
mukumii. Owo akhale mukumi mmurimani mwahu, eriyari ahu.
Hiyo ninvekela mwa Nsina na Yesu. Amen.

Khivaaweryaneya okhala mutthu aarowa ohimya
ohihimuwa!

⁴ Vano, voosiis'ula wa ohihimuwa, okathi muulupalexa wira
sookhumelela sikhaani sikhumelele mukereja vano, eyo ti,
aximai yaavahereryaka an'aya. Eyo ti ethu emosa esya, ethu

yincereriwe vatthokoni vaya. Eparakha emosa ya naanaano ehaarweela. Ni anthuna wira, mwa ehokoloxeryo, envahe Muluku.

⁵ Vano nto numala mu—mutthaka wa voosiisu, ninrowa okhalana mavekelo wa aretta, wira muhihimuxiwe mwa iretta sanyu, mukele mw'ekumini esya. Vano naanaanoru numala yeeyo, w'ale yiirale ahipatisiwe, ninrowa okhalana ehiximuxeryo ya yeeyo; ovithiwa mmaasini, wira ehiximuwe yeetaka mw'ekumini ya naanaano. Iwo ohihimuwa voomalela voosiis'ula, ohihimuwa! Mirima sahu sinkhala soothapa ni sooveya, okathi oniip'ahu masipo ni wiwa onamoono w'akina, wa voosiis'ula wa ohihimuwa wooreerexa. Nto ninniweha vate ni woona wira Muluku t'otteeliwa murima mwaha wa yeeyo, miri sinoohihimuwa.

⁶ Okathi uwo ovinre, oKentucky wu, Mwenye Wood ni miyo naaxaya ikhopa, vano khurwa empa ya mulopwana mmosa. Mulopwan'owo siiso okilante-ene vaava naanaano va, wa sothene sinsuwel'aka. Nto owo aahimmwa okhala oohaamini. Vano Munna Wood aahimukoha, khwira, "Pooti oxaya ikhopa owannyu?"

Owo khwira, "Ayo, Wood, pooti oxaya ikhopa. Rowakani wiithela."

Owo khwira, "Ahe, koorwaana, pastore aka."

⁷ Nto owo khwira, "Wood, khamuntthuna okileela wira murookhalaxa vathi mpakha murin'anyu omukuxa mulaleyi okathi wothene!"

⁸ Vano nto owo khukiihana wira a—akisuwelihe. Vano mulopwan'owo aahihimya wira aari mutthu oolipa murima saana. Owo aahimeeriwe n'akina, yeeyo, masi khaawerya woona hat'etthu yo omwaaminiha.

⁹ Nto waahikhala mwiri mmosa wa masa waaphwanyaneya vale kaarukunly'aka—mo masa. Waari mweeri wa Agosto. Nto miyo khimuhimeerya mulopwan'owo, miyo khwira, "Mwiri ule orina miyaakha mikavi?"

¹⁰ Nto owo khwira, "Miyaakha soophiyaka miloko miraru," etthu siiso wala ekina. Owo aaroophatteya.

¹¹ Nto miyo khwira, "Nyuwo munnikhuuraka masa okhuma okathi okhanly'aya wiimaka?"

"Ayo, mulopwana."

¹² Miyo khwira, "Exeeni eniireya ni mwiri ule? Nyuwo mwaweha vale, ola mweeri w'Agosto vano, onkhala okathi wooviha okathi wothene; masi vano mataakhuru anoomora mmwirini mme, vano ephwamwaasi enookhuma murinttani, khurwa vathi mmitathaarini. Yaakhanle-ru vaava okathi w'eyiita, mwiri khuwaarowa okhala-tho; masi eyo enrowa vathi, wira yaipithe mwaha wa ipheyo sooriiry. Yaakhanle-

ru osulu nno, waamookhwa, khuwaarowa wiima-tho masa. Masi enrowa vathi wiipitha mmitathaarini, wira ehokolowe mwaahiyu, wira yiime masa kamosa-kamosa akhumaka nipuro nlo, ni mataakhuru kamosa-kamosa.”

¹³ Nto miyo khwira, “Vano, mwenye, miyo—miyo kinvekela wira mukileele Osuwela xeeni oniiriha ephwamwaasi ile ohiya mwiri ohinatthi okathi wooriirya, n’urowa vathi mmitathaarini wira yaipithe? Mwawerya-ru okileela exeeni eniira yeeyo, ni okileeliherya yeeyo, exeeni eniiriha, vano kinimoohiyani ohela ntata nanyu wa Muluku.” Miyo khwira, “Muhele maasi vanripuni moone sinto animwiira, moone sinto orukunuwa w’ehuhu onimwiira. Wookhala Osuwela wuulupale onroiha ephwamwaasi ile vathi mmitathaarini, vano nto n’uruuha-tho n’ekumi esya. Owo ti Muluku.”

¹⁴ Nto owo khwira, “Miyo nkinatoko orowa okereja vanci-ene.” Owo khwira, “Masi aahikhala mulaleyi mmosa aarwiiye nno oActon, emaara emosa, khimuhimeerya muthiyana mmosa, aakhala omwaako iwe, yoowo munn’awe aari omuthukumanoni ohiy’ule, khimuleela wira aamuvekelela munn’awe aarina kankuru.” Ni khwira, “Amwaar’aka ni miyo naari weiwe wira nimukhaliherye.” Ni khwira, “Owo khaareere otepa, ni kankuru a nnipwiipwini, mpakha waarin’awe orukunxiwa voolilini ni mukhumi, ni siiso. Munn’awe aahiruaha nleso,” khwira, “mulopwan’ole vamanly’awe omuhimeerya mukhalelo awe ni sothene, khwira ‘mwampweherye nleso nlo.” Ni khwira, “Owo mukumii olelo.”

¹⁵ “Nto enoorowa wooniherya paahi.” Miyo khwira, “Osuwela weiwo omosaru wiirenle ephwamwaasi ile okela mmwirini, mwaakha ti mwaakha, ori ohoolo wanyu, wira erowe mmitathaarini yaipithe, waari Osuwela omosaru waakihimenrye wira muthiyany’ole aamurowa ovonihiwa n’uhela n...” Miyo khwira, “Eyo kahiyu yo—yootikinihaxa. Muhaana mulaleyi oolokaxa eemenle ohoolo vapuwani vanyu, mwiri, onoohimeeryani mwaakha ti mwaakha.”

¹⁶ Hiyo nawehaweha vale, ninnimoona Muluku mapuro othene. Owo ori mwa khula mwiri, khula nikukhu na malaxi. Khiivo hat’etthu enwerya okumiherya eyo woohikhala Muluku. Hiyo ninoowerya okumiherya etthu yoolikana ni yeeyo; masi kahi ekumi ile, ti Muluku.

¹⁷ Vano, nikukhu naamukhaani na malaxi nihincereriwa mwa itthoko kamosa-kamosa va, nto nintthuna waavahererya axaana ala w’Apwiya. Teddy, nihaana nsipo nikhaani va niniip’ahu, *Mwaaruhe*, munnitthuna orumiha nenlo okathi aximai antthuna wira an’aya evahereriwe, n’axitiithi, anaaruh’aya axinamwane va waltaari nno.

¹⁸ Ni nihaana maluwa manci-ene makhaani a Paasikha va waltaari voosiis’ula, khanirina? Wulu, wulu! Kinnitthokelela

wira aakhala aMaria axikhaani, aRuthi, aRepeka, Yakopo mukhaani, Paulo, ni Yohani, othene va, maluwa makhaani a Paasikha a nloko nikina.

¹⁹ Ti vooreera, vaavo vo. Kookupali wira Munna Beeler ontthuna okumiha elatarato ela ya mwa—mwaapar'ola mwaamukhaani ori va, owo—owo ti musulu awe Munna Wood, Munna Wood muthiyana va. Ni akina animoorwa vano n'axikhaani aya. Rwaakani ohoolo, mw'atthu. Ti vooreera. Munna Neville.

²⁰ Wuulupale ophitaana wo othelana wooreera, orumihiwe ni Muluku. Nto mwa othelana wooreera onnaaruuha anamwane ala axikhaani oophenteya.

²¹ Muhaana okileela nsina nawe va vano. Brenda Sue. Nyuwo munkhala ntoko oovirikanexa, ttutthu, ovikana okathi kaawonny'akani emaara yoopacerya. Ahe, va ori Brenda Sue Wood mwaamukhaani, muhakhu mwaamukhaani wooreerexa saana wa mirima sahu hiyo othene, ni vanci-enexa wa mai ula mwaamukhaani ni tiithi.

²² Nto okathi wa Bibilia. Atthu anci-ene annaamiserya axinamwane ala; masi hiyo nimphavela othhara elimalelo ya Bibilia voolikanexa ntoko sinwery'ahu. Hiyo khinnatoko woota nipuro awo atonko aya omiseriwa, mBibiliani, masi awo yaaruuhiwa wa Pwiya Yesu vano Owo aanaareeriha. Ni hiyo ninnaakuxa, ntoko arumeyi Awe, ni waavenxerya wa Yoowo.

²³ Kookupali wira munnaamini moota pwaapu sikhany'awe owiisinnuwaha, moosuwela. Tivo nrowe nuurame muru okathi vakhani.

²⁴ Pwiya Yesu, Mwaana a Muluku, Yoowo ovahereriwe mwaha wo ottheka wahu. Ni enkhala etthu yooreerexa owoona axinamwane oruhiwa wa Nyuwo, mwa otthapela ele ekhumelenle miyaakha sinci-ene khalayi, okathi aximai n'axitiithi yaaruuh'aya axinamwane aya wa Nyuwo. Hiyo ninninvarelela ohoolo Wanyu, olelo, mmoononi mwa waamini, Brenda Sue Wood mwaamukhaani, oveleliheriwe mw'emusini mwa Munna David ni mwaar'awe ooreerexa. Muluku Tithi, mmureerihe mwaan'ola.

²⁵ Awo annihimya owaaminini waya Nyuwo, okathi anoonihery'aya mulipu ula wa ophitaana waya. Ni ninvekela wira Nyuwo mwaareerihase. Ni mirima saya sikhale soovihihwa ni Eroho Yowarya, wira ekhalaneke makhalelo, vooreera murima owiivahererya, wira mwaan'ola aleliwe etthoko y'Ekristu, aleliwe sittharihiwaka miruku sa Muluku, ni akhalane ekumi yoolekela, yootteeliha murima mulaponi mu, ni oorumeeleni Nyuwo mahiku othene a ekumi awe. Ni Moovuwani, weiwo amusi anthukuman'aya, Brenda Sue aka mwaamukhaani n'atiithi ni amai, ni atthu aya othene, ethukumane erukurerye

ehice ya Muluku, oovuluxiwa ni mahala a Muluku, yaawo oninvenxery'ahu wa Yoowo vano.

²⁶ Mwaamurokor'aka, miyo kinnoo vahani vano wa Pwiya Yesu Kristu, wa makhalelo oomurumeela Yoowo, mwa Nsina na Yesu Kristu, Mwaana a Muluku. Amen.

²⁷ Muluku ooreeriheni, Marilyn, David, muhakalale vowaatta ni nsikhi. Mwaamukhaani akhaleke wa Omwene wa Muluku.

²⁸ Vano, va ori mwammiravo mmosa ooreera, otheya wuulupale wiitho wawe. Nsina nawe? [Mai onnaakhula. Nipuro vahiitthu mufiitani—Mol.]

Sharon Rose... [Mai oniira, "Sharon Daulton."—Mol.] Daulton. Daulton. Ola mwaana a Munna Ed? Ahe, mwa enamuna emosa, miyaakha soophiyaka miloko miili ni miili sivinre, Muluku aahimukumiha mmatatani mwaka Sharon Rose mwaamukhaani, yoowo ori Wirimu, olelo. Nto vano, wira kinvahererye wa Yoowo, ookhala Sharon Rose Daulton mwaamukhaani. Ninnaasuwela Munna Ed mulopwana ni Munna Daulton muthiyana, va, apatthan'ihu ooreerasa murima. Mwaana xeeni oosivela!

Tith'ihu a Wirimu, hiyo ninnimuruuha wa Nyuwo Sharon Rose ula mwaamukhaani. Nimuupuwelaka Pwiya Yesu muulupale, Yoowo aari elapo ya vathi, vano Owo aahiruuheliwa axinamwane athiyana ntoko ola, miyo kinninkelela ttutthu ula, Pwiya. Wira akhale mukumi ni a ikuru ni akhalane ekumi. Wira akhale wa ovuwa wa Muluku. Mwaareerihe atiithi n'amai. Wira ola aleliwe sittharihiwaka miruku sa Muluku. Awo anihimya owaaminini waya Nyuwo okathi animuruuh'aya ttutthu aya wa Nyuwo. Vano ninnoo vahani Nyuwo, Sharon Rose Daulton mwaamukhaani, wira Nyuwo mureerihe makhalelo awe, Pwiya. Miyo kinnimuruuha okhuma mmoononi wa mai n'atiithi, wa Nyuwo, Pwiya'aka ni Moopoli, Yesu Kristu, wa ovuwa Wawe. Amen.

Muluku ooreeriheni, murokora, ni nyuwo, munna.

Oh, wulu! Mwammiravo mmosa, oowoolowa. Mulattu awe xeeni? [Mai oniira, "Muru awe khunreere wunnuwa..." Nipuro vahiitthu mufiitani—Mol.] ... etthu emosa yoovirikana. Miyo kinnimwaamini Owo.

Pwiya, Muluku, kinninvarelela wa Nyuwo Mason mwaamukhaani. Kinvekela, Pwiya Yesu, wira Nyuwo mmukuxe ttutthu ula kinimukux'aka va mmoononi mwaka, wira kinvahererye wa Nyuwo. Miyo kinnipwapwela muxankiho ola mwa yoowo. Mwa Nsina na Yesu Kristu, wira Mason mwaamukhaani aheliwe mmoononi mw'Anyu, Pwiya, ni wira muxankiho omuhiye. Ttutthu ula akhale wa ntittimiho ni ovuwa wa Muluku. Axitiithi anooniherya waamini waya emuruuhaka. Nyuwo munvonihe mwaan'ola ni mmukhalihe mukumi. Wira owo akhale wa ovuwa wa Muluku, wira

oorumeeleni. Pwiya Muluku, miyo kinnoovahani Nyuwo Mason mwaamukhaani, mwa Nsina na Yesu Kristu, mwaha w'ekumi awe ni openuxiwa wawe. Amen.

[Nipuro vahiitthu mufiitani—Mol.] Mwaamini ni murima wothene.

Oh, mwaana mwaamuthiyana, tho? Ahe, ti yooreera. Murwe va, mwaamukhaani. Mweemele va. Nsina nanyu ti... [Tiithi oniira, "Sumner."—Mol.] Sumner. Munna mulopwana ni Munna muthiyana Sumner. Kookupali wira mwa a oGeorgia, khamuhiyo? Kuupuwela wira kaahuupuwela mavekelo. Aakhala atthu anci-ene vathi vale. Ola ti... ["Latrell."] Latrelle. ["Dwight."] Dwight. ["Davidi."] Ni Davidi. Muhiiwa nsina naya. Muluku alepe masin'aya Muliivuruni mw'Ekumi ya Mwaapwittipwitthi.

Tith'ihu a Wirimu, hiyo ninnaaruuha oophentiwa ala axikhaani wa Nyuwo voosiis'ula, okathi onihel'aka matat'aka mmikopweni sikhaani mmuruni mwaya, maihi makhaani owoolowa a aximiravo ala. O Pwiya, mwaareerihe. Axitiithi aya ahooniherya ophenta waya ni owaaminini waya yaaruuhaka an'aya. Ni hiyo ninnaavahererya wa Nyuwo, Pwiya, okathi ankuxiw'aya mmoononi mw'axitiithi aya, wira yeemele wa waltaari nno voosiis'ula, wira evahererye ikumi wa Nyuwo. Mwaareerihe, Tithi. Hiyo ninvekela wira Nyuwo mwaahiye ekhale akumi wira ekhale oothapa, mahiku othene a ekumi aya, Ekumi Ehinimala wa olumwenku onrwa. Wira eleliwe sittharihiwaka miruku sa Muluku, vatthokoni w'Ekristu.

Vano, ni oruma wa Yesu Kristu, aavahale ethoonyeryo arumeyi Awe, wira yaahaana ottharihela ntoko Owo siiraly'awe, miyo kinnaaruuha wa Nyuwo, mwa Nsina na Yesu Kristu. Amen.

[Nipuro vahiitthu mufiitani—Mol.]

Ohitto wu estaatu yo waarya nsuwa ya oGeorgia, ttutthu ula ooruuhiwa va n'atithi awe ni ame awe oophenteya, wira ovahereriwe wa Nyuwo voosiis'ula wa muupuxeryo. Ela etthuvo ya mahala Anyu mw'emusini mwaya. Kinvekela wira mmureerihe Renee mwaamukhaani, ame awe n'atithi awe. Ni wira awo yooniherye owaaminini waya, mwaha wo omuruuha mwaana, etthunaka iparkha Sanyu wa yoowo. Ni owo akhale mukumi ni a ikuru, muKristu oohakalala, mahiku othene a ekumi awe; ni akhalane Ekumi Ehinimala mwa mahiku anrwa, wa olumwenku ontthuna orwa. Munivahe, Tithi. Ntoko Nyuwo sikuxaly'anyu itthu sikhaani soosivela, ntoko anamwane ala voosiis'ula, mmoononi mw'Anyu, amusi ahooniherya owaaminini waya, mwaha wo waaruuha w'arumeyi Anyu. Vano hiyo ninnimureeriha Renee mwaamukhaani ni onvaha wa Nyuwo; okhuma mmoononi mw'axitiithi, mpakha wa Nyuwo. Mwa Nsina na Yesu Kristu, Nyuwo mmureerihe. Amen.

Mureerihiwe, munna. Muluku ooreeriheni, Renee.

Nrowe paahi niipe eversu ekhaani ya yeeyo.

Mwaaruuhe, mwaaruuhe,
Mwaakumihe vapuwani v'etampi;
Mwaaruuhe, mwaaruuhe,
Mwaaruuhe axikhaani wa Yesu.

²⁹ Oh, moota waarowa okisivela weemela muliinyani n'ulavula mwaha wa khula mmosa w'axikhaani awo, masi nkireere okhala oopisa, khula enamuna, ni atthu arimweemela. Munna Wood ookihimeerya voosiis'ula, wira muthan'awe waaniwereya', mwaha wo weemela. Khamunsuwela moota onooxukhuru-akani weemela n'ulipelela! Nto kinimwakuva saana ni mutthaka, ntoko vanweryaney'aya. Vano nyuwo nwiriyanane oratteene.

³⁰ Nkaakhalanne okathi wo otthokiha muteko wa voosiis'ula, ahiiso mutthak'ola voosiis'ula, okathi vakhani paahi. Kirookuxa yoosoma vano etthu yaari yoovirikana.

³¹ Nto Paasikha ookiserya kaahilaleerya mwaha wa: "*Akhalaka*, Owo ookiphenta. *Akhwaaka*, Owo ookoopola. *Avithiwaka*, Owo ooroiha itampi saka ottaiwene. *Ahihimuwaka*, Owo ookikhalihana naxariya mahala-ene voohimala. *Arwaaka*, oh, nihiku noovuwaxa!"

Vano nto voosiis'ula noolaleerya mwaha: *Miyo koosuwela*.

³² Nto vano, Apwiya yatthuna vale, kintthuna kisome ekapiitulu ya Marku Oowaarya. Nto nyuwo nvekele ni miyo vano.

³³ Nto naanaanoru numala yoola onookhala muteko wo ovoniha. Vano nto numala muteko wo ovoniha onookhala muteko wo opatiiso. Vano nto miteko s'okokhorela sinookhala olelo ohiyu iwoora thanu na piili ni minuutu miloko miraru.

³⁴ Vano Marku 16.

Numala ovira esaapatu, Maria a oMatala, . . . Maria maam'awe Yesu, ni Salome, yaahiruuha makhura oowunkhela, wira erowe yamuttikitthele.

. . . nihiku noopacerya na sumana voosiisu ene, nsuwa nikhumaka yaahivenya erowaka omahiye.

Nto yaanikohana yaaworu yiiraka, Tani onrowa onipirikixiha nluku nle vamukhora va mahiye?

Vano ewehaka, yaahoona nluku nlo nikumiheweene-vo: tthiri naari nuulupalexa.

Vano ekelaka mmahiye, yaahimoona mmiravo mmosa akilanthe-ene moonoo woolopwana, aawanre ikuwo sooteela; khututhwasa vanci-ene.

Vano awo yahaahimeerya awo. . . Vano owo aahaahimeerya awo wira, Muhituthuwe: Nyuwo munimphavela Yesu a oNasareti, aakhomeliwe

vamwiikimanyo: owo oohihimuwa; owo khaamo-mu: mooneke nipuro naixaatihwawe.

Vano murowe, ni mwaahimeerye awiixutti awe ni Petru wira owo onoohoola orowa oKalileya: weiwo nyuwo munomphwanya, ntoko sohimenryaaweni.

Vano awo yaahikhuma ni waakuwa, khutthyawasa omahiye iwo; maana yaanithukumela ni woova: nave khuwo yamuhimenryaya etthu; okhala wira yaamoova.

Vano Yesu vahihimuwaljawe voosiisu ene nihiku noopacerya na sumana, owo aahiisooniherya wa Maria a oMatala, mwa yoowo oomonlyawe minepa sootakhala mithanu na miili.

Vano owo aahirowa waaleela ehapar'ila ale yentte ni yoowo, okhala wira owo...okhala wira awo yaahiripiwa murima ni wunla.

35 *Moone, awo yaari vanikutthani n'ettuura, nave.*

Vano awo, vaiwalj'aya wira owo aari mukumi, ni wira muthiyan'owo aahimoona, khiyaakupanli.

36 *Moota Masu a Muluku ary'aya ootikiniha!*

Ohoola waya owo aahisooniherya wa...makhalelo makina w'ale anli, yeetta ekwaha, erowaka mmuttettheni.

Nto okathi...nto yaahirowa khwaaleela ale akina: nnakhala yaala khiyaakupanli.

Vookiserya aahisooniherya w'ale muloko ni mmosa okathi waaly'aya, nto aahaapwapwela mwaha w'oli...ni—ni ohaamini ni olipa murima, maana khiyaakupanli ale yaamonne ahihimuwale-ene.

Numala aahahimeerya wira, Murowe mulaponi mothene,...mwalaleerye soopattuxiwa sothene ehapari yooreera.

Ole onrowa waamini khupatisiwa onimooopowa;...ole ohinrowa waamini onoolamuliwa.

Vano ithoonyeryo iya sinimwaatthara ale anrowa wamini; Mwa nsina naka awo anoowoomola axetwani; anoolavula ilavulelo isya;

Anoovara inowa;...yawurya murette oniiva, khinaakumelela etthu yootakhala; anoowiixaatherya matata aretta,...ala anoovona.

Vano Apwiya vamanly'aya waalavuliha, yaahaakheliwa wirimu, akilanth'yaya moonoo woolopwana wa Muluku.

Vano awo yaahivenya enarowa, olaleya mapuro othene, Apwiya yaanaakhaliherya, ni yaanilipiherya masu ni sootikiniha saatthara. Amen.

37 Kaatthuna kikuxe yoosoma wa moolumo manli: *Murowe, Mwaahimeerye.*

38 Moosuwela, kheniphwanyiha etthu yooloka saana orowa mwaahikhalane etthu yo ohimya. Kinoona wira owo onnikhalaka mulattu muulupale w'olelo. Hiyo ninoorowa ohimya, hiyo ninoorowa masi nihirina hat'etthu yo ohimya, hat'etthu yooreera, hat'etthu yaarowa waakhaliherya atthu.

39 Masi hiyo natthara-ru miixuttiho ntoko awiixutti ala yaarina orummwa, hiyo nirina orummwa weiwo, "Murowe, mwaahimeerye awiixutti Aka wira koohihimuwa mw'alipa-ookhwa." Murowe, mwahimye!

40 Vano Owo oniira, "Murowe, mwalaleye, ni mooniherye ithoonyeryo iya wira Miyo ka mukumi kookhuma mw'alipa-ookhwa." Mutthaka zeeni! "Murowe, mwahimye, nto murowe, mwawoonihe awiixutti Aka itthu iya soonaly'anyu, wira Miyo nkikhwiye, masi koohihimuwa mw'alipa-ookhwa."

41 Mwa Mutthaka wa voosiisu voosiis'ula, noophwanya wira khula mmosa a hiyo ohaana nikuttha na ettuura ya mikattyamiho ni weereriwa nnikilaath'ahu niithomeiye vasulu, imaara kamosa-kamosa, nilipelelaka okurunuxiwa murima. Noophwanya wira tiithi muulupale Yobi aahikhalana yoowoona, okhala wira awo yiira ehinakhalane Paasikha nlelo, masi owo aahoona miyaakha ikonto xexe ohoolo voosiis'ula. Owo aahimoona miyaakha ikonto xexe ohoolo, Paasikha, vano khukhuwela, moohaawani mwawe, "Kooosuwela wira Nvuluxa aka ookhala! Mahiku ookiserya, Owo onimoorwa mulaponi. Hata axiitthu a musapalani ehononaka erutthu aka, nnakhala vo ni erutthu aka kinoomoona Muluku."

42 Vano, nuvira Paasikha, ninnoona wira Muluku aahimuruma mutthu, "Murowe, mwaahimeerye! Vano mwaahimeerya vale, *ela* enimoottharani. Murowe mwaahimeerye!"

43 Vano, khemphwanyiha etthu, ntoko sihimaly'aka, orowa, orowa, vahikhanle wira murina etthu yo ohimya. Vano mwakhalana mutthaka woovonyeya wira muhimye, weso khunrowa ovar'etthu yooreera. Muhaana ohimya ele ekhanle esiiri ene.

44 Okathi vakhani ovinre kaamusoma muliivuruni, sa mwammiravo mmosa aari...aakenle mooxiraanani. Mooxiraanani mu owo aatthuna wiikhaliha nsina nuulupale. Mwammiravo mmosa aawerya osuka eseenyanya mmuruni mwawe mpakha ophiya nipuro nimosa, nto aamurowa ohimya eseenyanya ela, vano namukhora ammuhiya ovira. Eyo yaari wira ephimmwe IQ [mphimo wa osuwela—Mot.] wa mwaana. Vano vaphiyaly'awe nipuro nlo, alavulaka iseenyanya saavahiw'awe,

mukhora waanihuleya vano owo aamphwanya nttittimiho muulupale.

⁴⁵ Mwamiravo mmosa, ory'ene owaakuva weetta, ni aanisuwela saana wira aamuwerya waaxintta amiravo othene akina moxiiraanani, wala uupuwela wira aamuwerya. Owo aanixutta nihiku ti nihiku, otthyawa. Moota iiseel'awe masasu awe makhaani, aahikhaliha erutthu awe oratteene, wira ahikhulumuweke okathi waarow'awe otthimakaka. Ni owo aanixutta moota wo opacerya n'inawu sawe, ni okhala ohoolo w'aximiravo akina. Ni moota waarin'awe omumulaka okathi wo otthimaka, wira avareleleke epheyo jaarwa mw'erutthuni mwawe, wira emukhalihe amumulaka arowaka, wira ehipisiheke murim'awe vanci-ene. Owo aahisoma wa khula epante aawery'awe.

⁴⁶ Nto voosiisu otthimaka waapaceny'aya, yaahikhala aximiravo oovikana emiya ni miloko mithanu yaathatanne, a munnuwelo mmosa. Mwamirav'ola aari mwamiravo a eyinnuwelo yooreera, wo wunnuwa wawe. Ni aanuupuwela wiixutta wawe wothene. Ni aari oolikana. Awo khuthataana, khuhela wiitho waya ohoolo wa mu—mukhoyi waari ohoolo, khookolela iphula saya osulu ohoolo wa yoowo. Owo aahisoma inamuna sothene sa yeeyo, khwiikhaliha oolikana.

⁴⁷ Vano nto voopiwaaya ekapwitthi, waahikwasiwa mukhoyi, aximiravo khutupha erowasaka. Vano mwamirav'ola oophwanela saana v'erutthu mpakha waatuphaly'awe khukhala ohoolo w'ale akina. Vano akhuruwelaka epista aahirowa vowaakuva saana, ooxuttihiwa saana, mpakha vaaweny'awe waavikana aximiravo othene yaatthimaka. Nto owo aari vale, oh, okathi munci-ene, khino minuutu mmosa wala ovikana, namatthyawa ooweryaxa ohinatthi ophiya nipuro nlo.

⁴⁸ Masi, wiixutta wawe wothene wa mw'erutthuni, owo aahiliyala eseena ene. Owo aahiliyala etthu ene aarow'awe ohimya, wira emutthuniherye ovolowa vamukhora. Vano owo khweetta nno ni nno, khuupuwelela, khuthokosa mmuruni mwawe. Owo khaareere ocaliwa mwa erutthu, ikhalelo s'ephattu sa erutthu awe, mpakha oliyala etthu yuulupalexa. Arwaaka, muliinyani, amiravo kamosa-kamosa yahaatthimaka ni waakuvaxa, yaahuupuwela eseena, khuvolowa.

⁴⁹ Siiso t'ery'aya olelo! Hiyo khaninreere ocaliwa n'uteka ikapela suulupale, ni ikereja ni ipa, ni siiso, ni ocaliwa vanci-ene okhaliha ikereja sahu mwa mukhalelo wooreera, ni ipa sooreera ni ikhukulu sooreera sa manri ni orkawu sooreera. Arumeyi ahu ooxuttihiwa saana opacerya... Awo ankhalana ikharawu sa Totori DL., Ph.D., LL.D., masi ninooliyala exeeni entthimakel'ahu. Owo t'ukhanle mulattu. "Murowe, mwaahimeerye awiixutti aka wira Miyo koohihimuwa mw'alipa-ookhwa ni kinoorowa okumana

n'awo oKalileya." Ninooliyala nuulumo nootthuneyaxa. Ninkhala ootthuwatthuwxaxa ni itthu sikina, nipakaka ikereja, nitekaka miromolelo suulupale, mpakha ninliyal'ahu nuulumo nootthuneyaxa.

⁵⁰ Ikumi sinci-ene sinnoopowa mwaha wa mutthokiheryo wa sookhumela sinikhuveela. Okathi vakhani ovinre, kaahileeliwa wira oFlorida, mutthu a ihapari, nipuro nin'himmwa ekhalelo y'okathi, yaahirumiha ehapari wira aahikhala mwanankhaya muulupale aarwa. Vano mulopwana mmosa aahuwa alyakhu, nto aahirowa wa namwaattamanani awe khimuleela wira aanirwa mwanankhaya. Owo khuhicala, khwira, "Ethiru!" Vano owo khukelela ohoolo tu. Owo khaawelinhe alyakhu awe. Owo kharonwe hata munikulani. Owo khatthokihale hat'etthu. Vano namwaattamani awe aahitthokiha itthu. Masi othene, ole ahaakhenle olopoliwa, alyakhu awe othene yaahikhumpwa othene khukhwa, emp'awe yaahiphweeyasa, muruttu awe khurimeela, owo khuroihiwa oxipiritali. Sothene mwaha wo wira owo khaiwelenle elopolelo! Owo aahisuwela wira muhupi waahihimmwa, masi khuvonya wiwelela muhupi.

⁵¹ Eyo t'inamuna enrwaaya olelo, ni anci-ne a atthu ahu, ni ikereja sahu sinci-ene. Hiyo noosuwela wira Bibilia onniixuttiha wira Yesu Kristu mmosaru nsana, olelo, ni mahiku othene. Hiyo noosuwela wira Bibilia onniixuttiha wira, Yesu oohimya, mwa Yohani Oowarya 14:12, "Ole onikaamini, nave, miteko Miyo sinvar'aka nave-tho owo onoovara; miteko suulupale ovikana iya oovara, okhala wira Miyo kinrowa w'Atithi." Vano hiyo ninnikhala oocaliwa ni itthu sikina, nihithokelelaka olopoliwa, nihixikhaka. Hiyo ninnitthimaka, masi nihixikhaka Mutthaka ene. Hiyo noorowa, masi khanisuwenle etthu yo ohimya okathi oniphiy'ahu-wo.

⁵² Mahiku vakhani avinre okathi ikereja sa olumwenku ula, okathi ikereja s'eKristu saaphwanyihw'aya ehaaya ni otakhaliwa, okathi murumeyi ootittimiheya ni oosuwanyeya ni oomoova Muluku, Billy Graham, aruuhw'awe ohoolo wa Bibilia. Owo aahitthimaka, masi aahiliyala Mutthaka; okathi Mmaka ole eemenly'awe ohoolo wawe khimuleela wira, "Ala yakhala Masu a Muluku, ninthuna niwooneni mooniheryaka Yaawo." Owo aahitthimaka saana, mihakalaliho suulupale, itthu suulupale. Masi, vaphiyenry'aya vooপুরoni, owo khaarina Mutthaka.

⁵³ "Miyo koohihimuwa mw'alipa-ookhwa. Miyo ka mmosaru nsana, olelo, ni mahiku othene." Otthimaka wa erutthu, ikereja sooreera, mamempuru anci-ene, miromolelo suulupale, masi owo kuhiyo ti mwaha muulupalexaxa. Nkawehani etthu yaattharella, "Vano ithooneryo iya sinimwaatthara ale anaamini." Murowe, masi khaasuwela etthu yo ohimya.

54 Muluku khonamurumeke mutthu vahikhanle wira Owo onoomunnya etthu yo ohimya. Muluku kweekwe onnilipiherya Masu Awe.

55 Orowa, masi ohiwerya ohimya okathi oniphiy'anyu iwe. Hata wira mihakalaliho sanyu sinnunwe sayi, ekereja anyu yinnunwe sayi, wala moota xeeni muromolelo anyu onvikan'aya sikina, mwaahikhalane-ru etthu yo waahimeerya, munkhalana exeeni woohikhala nikhuru n'atthu anthukumana vamosa ntoko elooca?

56 Hiyo nihaana Mutthaka wira nilaleerye olumwenku, "Yesu mukumii! Owo kahi ookhwa!" Oxikha saana Mutthaka!

57 Mwa elapo ela yuulupale hiyo ninxukhuru-ahu vano, Estadu Unidu sa wAmerika, mwa evitikavitika aya yothene, mwa ohifayi waya wothene, mwa myaha saya sothene soonanara, nlelo elapo yuulupalexa molumwenkuni, ni wopaceryani, okhala wira epaceriwe oratteene. Eyo khekuxale Mutthaka.

58 Miyaakha sinci-ene sivinre, okathi yaary'aya epaceryaka-ru, ehantisi emosa yookirweela mmuruni, wira Ankelesi yaarowa okuxa mixovo s'atthu ootaphuwa a elapo ela. Nto naahikhala nikhuru n'atthu yaathukumanne vamosa ni yaari mmutekoni, ewehaka. Ni yaahikhala ekhavalalo yeemenle yaathukweleliwe, ni namweetiha oolikana wira awele khula okathi. Etthu yoopacerya owo aarin'awe yaari ethoonyero wira Ankelesi yaanirwa, vano owo khuwela ekhavalalo awe. Yaarowa omphwanyiha mureerelo xeeni owo otannya ekhavalalo? Yaarowa omphwanyiha mureerelo xeeni owo omana ekhavalalo ni ophavela otthara ephiro okhuma ekerej'ele mpakha oBoston, yaarowa omphwanyiha mureerelo xeeni owo ahaarina mutthaka wo waahimeerya atthu? Awo yaarowa osuwela sayi moota wo wiitthokiha?

59 Paulo Revere ahu a naanaano ootthimaka saana, masi, awo anootthimaka paahi, khuuvo hata Mutthaka. Okathi ori vaava, othoiwa onimwiiraneya! Olumwenku ori woomalelani! Ikereja soophiyerya v'ethokani vaya. Ilapo soophiyerya v'ethokani vaya. Ekumi y'atthu yoophiyerya v'ethokani vaya. Siyensiya oophiyerya v'ethokani vawe. Hiyo nihiitthokiha khupaka ikereja suulupale, nihaatthokiha alaleyi ahu ni wa erutthu nihaathukumanya vamosa, wira esuweleke moota wo orumeela moolumo aya ni marukunxelo moolumo, ni masu aya ni—ni ivokaale saya sothene, ni itthu sothene oratteene mwa pisikoloxiyya, wira yaattamaneke n'atthu. Masi eyo kahi ile Yesu ohimaly'awe!

60 "Mwa Nsina Naka anoowoomola axetwani. Anoolavula ilavulelo isya. Enowa eniiva yaaluma vale, kheniwiiriha yootakhala. Yawiixaatherya matata aretta, ala anoovona." Olumwenku ommutthuna namitthaka orina Mutthaka, wira

ahimye etthu, ni osuwela nipuro Mutthaka onkhum'aya-wo ni wa Ole Owo onkhum'aya-wo.

⁶¹ Paul Revere, vaawenly'awe vakhavaloni vawe, mutthu oominyala, mutthu ori muhina mwa wahala vaakhakala-ru wira yookhala elapo wira okhale wahala. Owo aaheettiha voosuweleya iwe okhuma mw'evittoni sa okereja, ni mutthaka mmosa waatutunxe atthu othene, okhuma namuhaawi oomalela mpakha thaaciri oomalela, okhuma mulimi mpakha mulipa a nakoso, "Ankelesi annoorwa!" Nto mamilisiyaano khwiitthokiha wira etuphele. Vano elapo ela yuulupale khoopoliwa.

⁶² Vakhala wira yoorithi ila ya Muluku, vakhala wira atthu ala Muluku aakhwenly'awe, vakhala wira Ekerej'ela eniihaniwa ni Nsina Nawe, eri wira yoopowe, hiyo nihaana okhalana namitthaka orina Mutthaka onkhuma Veehiceni, wira omaliherye mutharimulo w'olelo. Ookhala Koliyathi, masi Muluku vekeekhai onookhalana Davidi nipuro nlo. Nihaana ophwanya ekumanelo. Nihaana okhalana e . . . Nihaana okhalana Mutthaka.

⁶³ Hiyo ninoorowa, masi wo ohikhalana etthu yo ohimya. Eyo ennooniherya, naaphiyeryaka nipuro elapo emosa wala atthu anikhoott'aya wira Yesu Kristu ti Mwaana a Muluku, n'ukhala ohoolo w'arumeyi ahu ootharimuliwaxa olelo. Vano nto mwaataano ahu muulupale wa ekereja, waaphwanyaka Makomunista miloko miraru ankuxa ipaphelo mwa miyaakha miloko miili wala miloko miraru, wira awo mamempuru a epartiitu Komunista, eriyari ya ikereja sahu so wiiraana. Niireke exeeni? Eyo enooniherya wira awo aroothimaka ehirina Mutthaka; etumihaka ihaakhi s'eyuulupale ya elapo, etumihaka ihaakhi soolimaleleya sa Ekereja.

⁶⁴ Yothene eyo yoophiyerya va eyooniheryo. Yoophiyerya nipuro Ekereja yaamukhaani yaaminni Mutthaka, ni yeemenle ni manawu oomanli, ni maithe aya ewehaxaxaka Vamwiikimanyo, mmurimani mwaya ohihimuwa wa Yesu Kristu, ovihiwaka! Yoophiyerya nipuro vaavo ilapo sirin'aya osuwela Yeeyo. Eyo eri va eyooniheryo. Khivanxankiha ikereja . . . Mwaalaano wa Ikereja, ory'aya wooponoweliwa ni Komunismu, khivanxankiha awo ahinwery'aya waamini ya erimu. Khivanxankiha awo ohiweryaka waamini ovoniha w'eMuluku; awo kharina hata Mutthaka mmurimani mwaya, hata wira anwerya sayi otthimaka.

⁶⁵ Eroho Yowarya yakela-ru mmurimani mwa mutthu, owo onimwaamini wira Yesu Kristu oohihimuwa mw'alipa-ookhwa, ni wira Owo mukumi mwa yoowo, ni wira, ni wira otthuna Owo orwenly'awe wira; otthuna, otthuna wa Muluku mwa makhalelo a mutthu.

66 Masi, mulattu ene, hiyo ninootthimaka, hiyo ninoorowa nihirina Mutthaka. Hiyo ninrowa ni teyoloxiia. Hiyo ninrowa ni enamuna emosa yo otaphulela Soolempwa wa ekereja.

67 Nihaana orowa ni ohihimuwa! “Murowe, mwaahimeerye awiixutti Aka wira Miyo kinootthokiha ekereja esya”? Nnari, mulopwana! “Murowe, mwaahimerye awiixutti Aka wira Miyo koohihimuwa mw’alipa-ookhwa, ntoko saahimaly’aka wira kaamuhihimuwa.” Owo ti Mutthaka wa Ekereja voosiis’ula, wira Yesu khokhwiye. Owo mukumii, ni muulupalexaxa ni oowerya olelo ntoko Owo sitonko awe okhala.

68 Hiyo ninnikhalana mitthaka sinci-ene sa olopola, wira niilikanyihe, Paul Revere ni alopwana akina aalupale, ni ikhotto suulupale ni mwanankhaya, ni itthu.

69 Vano, Muluku onniveleeliha Mutthaka woolipiha, nave. Ola waari Mutthaka woolipiha.

70 Okathi vakhani ovinre, okathi waakhalaniw’aya opottha Okuusini, aBoweri yaanaaruha okhuma wAfrika du Sul atthu a weiwo, ale niwiihan’ahu, olelo, “atthu ooriipa.” Vano awo yaanaaruha nno ni waatumiherya atthu a wAmerika Okuusini, wira yaakhaliheke ipottha.

71 wAfrika olelo wookhala mutikiniho muulupale olelo, wiivanana, ni sikina, sinkhumelela. Awo anwanela otaphuwa waya. Awo ahaana ehaakhi yo owanela yeeyo. Muluku ompanke muthu; mutthu opanke ipottha. Khenakhaleke t’etthunelo.

72 Miyaakha vakhani sivinre, kaari mukolisewu, ahiiso musewu muulupale, kiireke. Kaamweetakasa, kiwehaka ilatarato soohiyana-hiyana ni itthu, maana okisivela irattelo. Kinoona wira Muluku ori mw’eratteloni. Vano miyo kaaheetta, nto kaahiweha wira aahikhala mulopwana mmosa Nooriipe, owo aari mulweene saana, oomora makhata, ni mukopwe mwaamukhaani wa maihi waakohi wawe. Owo aawanre exapheyo awe. Nto aamweetakasa, ni etthu emosa *siiso*, awehawehaka, ntoko wira aaweha wala aaphavela etthu mmusewuni. Miyo khweemela ottuli khunweha okathi vakhani.

73 Nto nuvira okathi vakhani aahirwa vakaaxani yaamukhaani vale. Vano owo khunaweha memmo, nto khututhuwa, nto maitho awe khunaarya. Khutupha athikelaka ottuli okhuma vakaaxani minuutu mmosa, khurula exapheyo awe, khuwarela mmatatani. Nto miyo kammuweha. Nto okathi mulweene owo ooriipa uurammy’awe muru, maithori khupacerya omora wiitho wawe. Vano miyo kaaninweha n’utikinihiwa, okathi vakhani.

74 Vano miyo khuupuwela, “Kinoosuwela exeni emutannyale mutokweene ole.” Miyo khweetta kirowaka epantt’ila, nto wa miyo yaakhala ntoko evistiitu yaaphwanyaneya vale.

75 Vano miyo khunweha eemenle-ene vale. Nto miyo khurowa, khwira, “Ehaali anyu, haalu?”

Owo khwira, “Ehaali anyu, mulopwana.”

⁷⁶ Nto miyo khwira, “Miyo ka murumeyi. Kirootikinihiwa owoonani nvekelaka nipuro nenla.” Miyo khwira, “Kookupali wira mwa muKristu.”

Owo khwira, “Ka yoowo, mulopwana.”

Nto miyo khwira, “Xeeni ehireere woohakalalihani?”

⁷⁷ Owo khwira, “Murwe va.” Vano miyo khurowa ni mutokweene owo, mpakha vaavale. Owo khwira, “Munnoona evestiitu ile?”

Miyo khwira, “Ayo, mulopwana.”

Owo khwira, “Munnoona nlepa nle vaavale?”

Miyo khwira, “Ayo, mulopwana.”

Khwira, “Muhele ntata nanyu mpararini mwaka.”

Miyo khwira, “Nipuro xeeni noowoma?”

⁷⁸ Owo khwira, “Musako wa epottha waaroovira-vo, nihiku nlo. Nto *ele* ephome ya Abraham Lincoln.” Owo khwira, “Ephome awe yookumiha musako w’epottha mwa miyo.” Khwira, “Eyo khiyaarowa woohakalalihani, nave?”

⁷⁹ Miyo khweemela vaavale ooxanka-ene. Miyo khuupuwela, “Vakhala wira ephome ya Abraham Lincoln yaamurowa omuhakalaliha—omuhakalaliha epottha, mwaha wo okumihiwa musako w’epottha mwa yoowo, khiyaarowa Ephome ya Yesu Kristu owiiriha atthu ntoko Rosella va, aari epottha ya onamuhapaliwa; wa miyo, kikhwaaka, namuhaawi ootakhaliwa?” Owo ookumiha musako w’epottha ya etampi mmurimani mwaka. Eyo khiyaarowa omuhakalaliha mutthu? Eyo khiyaarowa omoonihya voovirikana? Eyo khiyaarowa omukhaliha ni ntittimiho okathi onuupuwel’awe yeeyo? Khamukhanle woona mwiri muhirukunxale muru, voorika, osuwela wira Yesu oovuluxa ekumi anyu Vamwirini vale.

⁸⁰ Nitthikelaka, okathi mmosa, n’ipottha, ni muupuwelo ahu. Yaahikhala elaleeriwo, Elaleeriwo wo Woopowa, waalempwe, nto ipottha saarowa okhala sootaphuwa nihiku nlo. Nyuwo khamunsuwela, oh, vakhala wira khamunatoko omphwanya Kristu, nyuwo khamunasuweleke etthu eyo yaahimy’aya wa ipottha iye. Okathi onrow’aya, mutthaka mulaponi, wira, “Munrowa otaphuwa nihiku khata, okokola wa nihiku. Munrowa otaphuwa. Khamunrowa-tho owara misako sa ipottha, nnakhala khamunrowa-tho omaniwa. Masi mootaphuwa, vano mwa nammuttettheni a Estadu Unidu muulupale. Khamuhiyo-tho epottha, numala okhuma nsuwa voosiisu khata.” Oh, awo yaaniwehererya ni nrromelo muulupale.

⁸¹ Vaakhanle wira natampi aaniwerya woona eyo! Vaakhanle wira natampi aaniwa paahi Ehapari yooreera! Kahi wiitakanxa wa ekereja, masi olaleeriwa wa Ehapari yooreera,

mukhanly'anyu otaphuwaka wa etampi, mukhanly'anyu otaphuwaka mw'eretta anyu. "Mwa okathi uwo," owo p'ukathi onaamini anyu.

⁸² Moosuwela, ipottha iye saari soohakalala ni sooromela, silipelelaka okathi saarow'aya okhala sootaphuwa, mpakha, kileeliw'aka, wira yaahithukumana vathi va mwaako, aximai n'axaana, othene oothukumana, ni atokweene amosa-amosa. Vano awo yaahiwelasa mpakha vasulu va mwaako, ohiyu eriyari. Awo yaanisuwelasa wira waxaaruu ni nsuwa khukhuma, yaamukhalasa ootaphuwa. Khiwaavinre minuutu nuusu wira nsuwa naarye vasulu va mwaako, masi akina a awo jaarisa vasulu va mwaako, erupelelaka, erupelelaka. "Oh, nsuwa nakhuma-ru, hiyo nootaphuwa." Owo aari m-w-a-a-n-a... wala, n-s-u-w-a.

⁸³ Masi M-w-a-a-n-a avenya-ru nihiku nlo! Ni okathi M-w-a-a-n-a ohihimuwaly'awe miyaakha ekonto ni imiya thanu na xexe khalayi, Owo ookwasa khula musako w'epottha, Owo oomutaphula khula namutthukiwa, Owo oovoniha khula eretta, Owo ohaavaha otaphuwa ale ari mw'epotthani. Moota vaatthuneya hiyo owela n'uweha!

⁸⁴ Ni okathi nsuwa nithurumenly'aya, yoopacerya, mutthu aari v'ethokani, aahoona, nto khimukhuwelela mutthu aattharelana, "Hiyo nootaphuwa!" Vano mutthu aattharelana khimukhuwelela mutthu aari ottaiwene vathi va mwaako, "Hiyo nootaphuwa!" Mpakha ophiya vapuwani, "Hiyo nootaphuwa!" Maana, nsuwa naamukhuma, awo yaamulipelela, elipelelaka, elipelelaka okathi ule.

⁸⁵ Vaahitepa hiyo okhala nimulipelelaka, olelo, M-w-a-a-n-a a Muluku. Hiyo nootaphuwa mwa etampi. Hiyo nootaphuwa mapixi. Hiyo nootaphuwa mwa mihapo. Hiyo nootaphuwa omulya soona, owurya, ohapalasiwa, okhala wira M-w-a-a-n-a a Muluku oohihimuwa mmahiyeni ni ookwasa khula nikwicili. Olamuliwa wothene woomala! Okopha woolinwva. Ehukhumu yothene yoolinwva. Itampi sookumihiwa, nto hiyo nootaphuwa. Oh, hiyo nootaphuwa! Opottha? Otaphuwa, okathi Mwaana a Muluku onvenyaawe ni ovoniha mmapuphani mw'Awe!

⁸⁶ Nihiku nlo Owo onoovenya okhuma Veehiceni, ahokolowele elapo ya vathi. Vano nto hiyo ninootaphuwa owereya wothene ni weereriwa wothene, ninootaphuwa mwa iwereelo sothene sa okhwa ni sothene sinrowa n'ikumi enookhwa, wira nakhaleke ni Yoowo voohimala. Hiyo ninootaphuwa. "Murowe, mwaahimeerye," eyo t'itthu ene yo wira.

⁸⁷ Okathi wa Bibilia, waahikhala mwaakha wa yopeeli waarwa. Atthu yaatumihiwe mwaha wa okopha yaalokihiw'aya. Awo yaanilokihiwa yookopha yahaawery'aya oliva, tivo awo yaanirowa ni wiitumiha w'atthuni, wira ekhale ipottha. Nto awo yaahaana okhala ipottha saya, ipottha saya, ekumi

aya yothene. Masi, imaara kamosa-kamosa, naaniphiya nihiku na mahala, nenlo naasuveliwa ntoko mwaakha wa yopeeli. Nto okathi waaphiy'aya mwaakha wa yopeeli, nto aanrowa namukuttho mmosa khurumiha nlope. Vano nlope nlo naamusuveliwa khula epottha, voochicala okathi xeeni owo aakhanly'awe arumeelaka ni okathi xeeni waarin'awe wira arumeele, vaarum'aya nlope nle, epottha eyo yaanikhalihwiya yootaphuwa. Yaaniwerya ohiya ehipa vathi khunarowa owaani w'ana awe. Eyo khiyaarina-tho ovara muteko, okhala wira aahitaphuwa okathi aarum'awe yopeeli. Nlope nle khanaaruma nsu noohisuwanyeya, masi naaruma nsu noosuwanyeya. Vano mutthu aamuwerya ohiya ekarum'awe vathi, khunarowa owaani otaphunwe-ene mw'epotthani.

⁸⁸ Voosiis'ula, Bibilia ohimye wira, "Nlope narumiha nsu noohisuwanyeya, t'ani onrowa osuwela etthu yo wira?" Vakhala wira Bibilia oolaleya wira Yesu Kristu oohihimuwa mw'alipa—okhwa, Owo mmosaru nsana, olelo ni mahiku othene, vano malope niniw'ahu oruma olelo khunaira, "mahiku a miiriirya aamala, khiivo etthu ene eyo ntoko ovoniha wa Muluku," t'ani onrowa osuwela moota wo wiitthokiha?

⁸⁹ Emphavel'ahu olelo t'anamitthaka oottikittheliwa ankhuma wa Muluku! "Owo oohihimuwa mw'alipa-ookhwa! Owo mmosaru nsana, olelo, ni mahiku othene!" Owo t'ori Mutthaka wa nihiku.

⁹⁰ Oh, sinnikhalaka mitthaka suulupale, masi Paasikha ookhuneela sothene iyo! Mitthaka suulupale; Paasikha aari sothene iyo! Okathi alipa-ookhwa...yaapakiw'aya etthokiheryo wira nwanani ookiserya...Hiyo naanoona iretta ovonihiwa mwa Waataana Wa Khalayi. Hiyo naanoona miiriirya opakiwa mwa Waataana Wa Khalayi. Saahikhala soowoona saarwa mwa Waataana Wa Khalayi. Masi khula mutthu aarowa mmahiye, aphavelaka osuwela sinto aamukhalakhala ahihimuwaka. Masi voosiisu wa Paasikha, okathi awiixutti ala yaakhenly'aya Mutthaka muulupalexa mutthu aakhalakhal'awe aphwanyaka, awo yaaphwannye exeeni? "Murowe, mwaahimeerye awiixutti Aka, Miyo koohihimuwa mw'alipa-ookhwa!" Okhwa waahixinttiwa!

⁹¹ Khaatonko okhala mutthu elapo ya vathi, hata profeta, hata mutthu muulupale, hata mutthu oowaarya aatonko owerya oxinta... Awo yaaniwerya oxinta eretta ni Eroho ya Muluku. Awo yaaniwerya oxinta okathi, ni Eroho ya Muluku, ni woona khalayi ene itthu saarwa. Awo yaaniwerya oxinta eyo. Masi khaatonko okhala mutthu oottikittheliwa ni muttikitthelo owo wa Muluku, aawerya ohimya nuulumo nla, "Kinniwerya oleva ekumi Aka, kinookuxa-tho. Mpwanyulase erutthu ila, Miyo kinooteka-tho mmurotoni mwaya." Khaatonko okhala mutthu aawerya ohimya nuulumo ntoko nlo. Vano eyo yaanithananiha murima aya, sinto yaamurowa okhala ekeekhai wala nnari.

⁹² Masi voosiisu wa Paasikha, awo yaahaakhela Mutthaka, “Murowe mulaponi mothene, mwalaleerye Ehapari yooreera soopattuxiwa sothene. Miyo koohihimuwa mw’alipa-ookhwa. Nto, Miyo kinookhala ni nyuwo mahiku othene, mpakha omala olumwenku. Ole onrowa waamini khupatisiwa onimooopowa, ole ohinrowa waamini onoolamuliwa. Vano ithoonyeryo iya sinimwaatthara ale anrowa waamini: mwa Nsina Naka awo anoowoomola axetwani; anoolavula ilavulelo isya; yavara inowa wala owurya itthu siniiva, khenaakhumelela yootakhala; awo yawiixaatherya matata aretta, ala anoovona.” *Mutthaka wa Paasikha*, owo mmosa wa mitthaka suulupalexa sikhanel. Okhwa waahixinttiwa!

⁹³ Hiyo ninnimuupuwela muxintta. Napoleawu, arine-ene miyaakha miloko miraru ni miraru, aahixintta olumwenku. Owo aahixintta olumwenku, owo aahihukumu khula elapo yaakhanle wira ehukummwe. Vano owo aahivolola okhala wira khaakhanle hata mutthu mukina wira awanane, owo khukilaathi khunla. Khaakhanle mutthu mukina wira awanane, masi owo khaattharinhe malamulo a musewe vooreera. Anamuttompe ikonto miloko sene yaanaatthara atoropa awe, owo aarowa ni kapwitthi ni xoowa. Ni miyaakha miloko miraru ni miraru, owo aahixintta olumwenku. Masi owo aahitoko okhala namakaaliha, ni okhwiye namuhapaliwa ootepa, okhala wira khaattharinhe malamulo a musewe vooreera. Owo aahiliyala mutthaka. Owo aahixintta, masi aahiliyala mutthaka. Owo aahirowa, masi aahiliyala etthu aarowel’awe.

⁹⁴ Ntoko mwammiravo aaxiraana motthimakani, ntoko ekereja sintthimak’aya olelo, ntoko atthu antthimak’aya, ntoko elapo entthimak’aya! Ntthyawelo nahu khasihiyo ikapwitthi s’atomu, ntthyawelo nahu ti Yesu Kristu ni ohihimuwa Wawe.

⁹⁵ Napoleawu aahiliyala etthu yuulupalexa. Exeeni yaamukhumelenle? Owo aakhwiye ooxinttiwa voomalela, namuhapaliwa ookhwa. Mwaha wa zeeni? Owo khaamuttikhale musewe oratteene, onamwi aaxinttale olumwenku, va erutthu. Owo aahaatthokiha atoropa. Owo aari ooratta mwa ekhotto, owo aanikuxa khula elapo ni wira itthu (wira owo) wira khaavo hata mutthu mukina aarowa okhalakhala aweryaka wira, wala aatonko wira, ntoko yoowo, masi owo aahiliyala ole waakhanle mutthaka w’eeekhai. Owo aahikuxa, khukhalana ikuru sawe s’enatoropa, masi owo aahiliyala ikuru s’Apwiya.

⁹⁶ Ikuru s’Apwiya ti ohakalalihiwa wahu. Hiyo khanrina hata ikuru. Nkirina hata ntthyawelo, hata mmosa! Muluku amoriwe ikharari! Akuxe ekumi aka, masi ahikihiye kiliyalaka vankhuma ikuru saka. Sinkhuma w’Apwiya! Nkintthuna itthu sooreera sa molumwenkuni. Kimmutthuna Yesu, kintthuna ohihimuwa Wawe ovarela mw’ekumini mwaka.

97 Moota yaary'aya yovirikana ni Yesu Kristu mwa miyaakha miloko miraru ni miraru! Ni miyaakha miloko miraru ni miraru, Yesu aahikuxa itthu sothene; Owo t'opanke olumwenku. Nto Owo aari molumwenkuni, vano olumwenku khiwaamusuwenle. Owo khonaikhaliheke Mmansawe a ntittimiho. Owo khaatonko waathukumanya anatoropa. Owo khonathokiheke hata ikereja. Owo khonaikhaliheke masina maalupale Mwaneene. Owo khonarweeke ni ikharawu so wiihimya-no sa mwiixuttiho, teyoloxiia, ni sikina, khaarina hata yoolempwa yaahimya wira Owo aahinto orowa oxikola wa teyoloxiia. Masi Owo aahikhalana Muluku. Owo aahikhalana Muluku. Nto ni miyaakha miloko miraru ni miraru, Owo aahimuxintta khula xetwani aakumihenrye muru awe ota wa omooroni. Owo ooxintta eretta. Owo ooxintta ithiru. Owo ohaaxintta axetwani. Owo aahixintta okhwa. Nto okathi Owo okhwiw'awe Vamwiikimanyo, Owo aahikhuruwela mapuro oowiixa a omooroni, khuxintta omooroni.

98 Nto voosiisu wa Paasikha Owo aahixintta mahiye. Mwaha wa xeeni? Owo aahitthariha malamulo a musewe oratteene, athimakaka ni Mutthaka. Owo aahikhala, Owo aahirowa! "Murowe." Muluku aaroomuruma, ni Owo aahikhalana Mutthaka wo waahimeerya. Nto ni Mitthaka Muluku aamuvahaly'awe, Owo ooxintta ikuru sa Satana. Owo ooxintta eretta. Owo ooxintta okhwa. Owo ooxintta omooroni. Owo ooxintta mahiye. Mwaha wa xeeni? Owo aahirowa! "Murowe, mwaahimeerye!" "Miyo okathi wothene kiniira ele Atithi Aka anikoonihery'aya wira kiire. Nkiniira hat'etthu woohikhala wira Awo anookileela wira kiire."

99 Vano Owo ohinatthi okhwa, Owo aahihimya ela, "Siiso ntoko Atithi akirumaly'aya, ni Miyo kinimoorumani." Kahi waakhaliha atthu ni ikuru s'eneratoropa; kahi ohela okathi anyu wothene mwa aani onrowa okhala Mukhulupale. Eyo pooti okhala yoothuneyaxa, masi kehiyo yoothuneyaxa mwa *Ela*. Olumwenku woorowa. Hiyo nrina Mutthaka mmosa, okhanle, Yesu Kristu oohihimuwa mw'alipa-ookhwa, ni Owo mmosaru nsana, olelo, ni mahiku othene.

100 Nsana, musaala emosa yaamukhaani ya mpwaro mwa milattu, awo yaaphavela okiiriha miyo ohimya etthu yahaari yooloka. Miyo khwira, "Miyo nkihiyo mulipa-oothepya." Miyo khwira, "Miyo ka—miyo ka—miyo ka naxariya. Ni nyuwo khamukhanle oohimya hat'etthu woohikhala ekeekhai."

101 Nto mulopwana mmosa aari ni miyo, khwira, "Aakhanle wira mutthu aarowa olavula ni miyo siiso, kaamutthuna omulokoha."

102 Miyo khwira, "Nnari, mulopwana. Nnari, eyo kehiyo yooreera. Eyo kehiyo enamuna yo waattamela. Kherenre."

103 Owo khwira, “Ahe, muhinsuwelela-ni itthu iya siniiraneya? Muhikhalelele-ni iwo mwiiraka yeela?”

Miyo khwira, “Kinviriha okathi aka kimurumeelaka Yesu Kristu.”

104 O Muluku, oh, atthu ari ohoona ni khanwerya woona! “Ntoko Atithi akirummy’aya Miyo,” Atithi yaaroomuruma, Owo khurowa. Owo aahikhalana Mutthaka wo waaleela atthu. Nto okathi wo okhwa, Owo khuxintta okhwa ni khuxintta omooroni, ni khuxintta mahiye. “Ntoko Atithi akirummy’aya Miyo ni Mutthaka, Miyo kinnoorumani ni Mutthaka; kahi wira muteke ikereja, mitthenkeso, masi murowe mulaponi mothene mooniherye Owerya wa Eroho Yowarya. Ithoonyeryo iya sinimwaatthara ale anrowa waamini; mwa Nsina Naka anoowoomola axetwani, anoolavula ilavulelo isya, anoovara inowa.” Nto okathi irutthu sahu sinrow’aya mmahiye, ntoko Owo siiraly’awe, Owo ooxintta okhwa, omooroni, ni mahiye. Owo ti Muxintta oowerya.

105 Owo onniruma hiyo ni Mutthaka Awe. Nirowe ni Mutthaka, nirowe n’itthu yo ohimya. Murowe, mwaahimeerye! Kahi otthimaka vano khuhinawerya ohimya; rowe toko nikuxe yoowo mmurimani mwahu.

106 Mwaarwaaka ovekeleliwa, voosiis’ula, muhirwe mwa enamuna emosa piswa-piswa. Murwe ni Mutthaka mmurimani mw’anyu, “Miyo ka Ole kaakhwiye, vano kinnikhala-tho. Miyo ka Ole kivanhe Mutthaka, ‘ithoonyeryo iya sinimwaatthara ale anrowa waamini.’ Vakhala wira Muluku Oowerya sothene aahiwerya omukuxa mwa—mwaana mwaamukhaani oovirikana maitho khukhaliha woona wawe woolikana; Muluku aahiwerya omukuxa mwaana, mwa, mwammiravo ooyariwa, ahaatonko woona ookhalaru, nto miyaakha muloko ni mithanu na mosa, khimuhokoloxerya woona wawe; Muluku onniwerya omukuxa mutthu oohaawa namutakhaliwa oolyiwa ni kankuru . . .

107 Nto okhala wira Mutthaka ti wooloka, okhala wira Muluku ooveleeliha Mutthaka, okhala wira Muluku oomuruma namitthaka, vekeekhai khula kapwitthi a omooroni onrowa omoopelaka yoowo. Ti yeeyo, owo onookwakwattuwa amore, n’uvenya n’utatha muru awe, n’ukelela ohoolo. Hiyo nihaana Mutthaka, khiivo etthu enrowa omaaliha Owo! Aleluya! “Vamwala va Miyo kinooteka-vo Ekereja Aka, nto mikhora sa mookhwaani khasinrowa oxintta.” Awo pooti ohimya etthu antthun’aya, wira etthu antthun’aya, xetwani pooti owali n’ukhuwela. Masi Yesu oohihimuwa mw’alipa-ookhwa, Owo onkhala mwa hiyo olelo!

108 Mahiku vakhani avinre, kilavulaka ni Totori Lamsa muulupale, yoowo omutaphulenle Bibilia a Eramaiku, mw’Enkelesini. Nto kaahooni ethoonyeryo ele yaamukhaani,

ethoonyeryo ya Muluku vale, ni malepa mararu makhaani mwa yeeyo. Miyo khwira, “Totori Lamsa, exeeni ile?”

Owo khwira, “Ole ti Muluku, ni mikhalelo miraru.”

¹⁰⁹ Nto miyo khwira, “Munthuna wira, Muluku akhalaka mwa miteko miraru, ntoko, Tithi, Mwaana, ni Eroho Yowarya?”

¹¹⁰ Owo khuvanya khukiweha, maithori khunamora mmaithoni mwa muYuta ole, owo khwira, “Munnaamini yeeyo, Munna Branham?”

Miyo khwira, “Ni sothene siri mmurimani mwaka.”

¹¹¹ Owo khukupweherya miyoono sawe, nto khwira, “Kaahitikinihiwa okathi woonaly’aka vale itthu tthaaru suulupale sikhumelaka, ni ithoonyeryo mwaapak’anyu.” Khwira wira, “Kaahileeliwa wira mwaari profeta. Miyo nkaaminiki, mpakha vano. Vano koosuwela wira mwa yoowo.” Owo khwira, “Ti yeeyo! Owo ti Mutthaka. Eyo t’itthu enrowa ottikinya Omwene wa Muluku.” Ayo. Owo khwira, “Nihiku nlo munookhwela eyo, mmiravo.” Khwira, “Munoolipiherya onamoon’anyu ni etthu ene yeeyo.”

¹¹² Mmosa w’axilopwana aalupale nrin’ahu, okathi Eisenhower ni axilopwana aalupale a mulaponi, Hollywood, inamuna sothene s’aratti a isineema ni sothene simwiihanaka, masi owo khukhala vaavale vamuthukumanoni. Owo khwira, “Kihaana miyaakha miloko miraru n’itthu, kikuxaka ephulelo ela, kahi okhuma Ekereku y’oVatikano, masi okhuma Aramaiku; okhuma yeeyo ene, okhuma Aramaiku, mw’Enkelesini.” Nto owo khwira, “Kooviriha okathi wothene owo,” owo khwira, “Vano koophiyerya nipuro vano vaavo ommoon’aka Muluku a mBibiliani, eetteetaka.” Owo khwira, “Moosuwela, Munna Branham, hiyo ninoowerya woona ithoonyeryo ni sootikiniha, masi ninnikasooapa Nsu xeeni ethoonyero nrin’aya. Hiyo aYuta, hiyo ninnoona ethoonyeryo, masi ninnikasooapa Nsu na ethoonyeryo.”

¹¹³ Oh, Aleluya, Nsu na ethoonyeryo! Muluku aahimuhimeerya Moise, “Awo yaahiiwelele Nsu, Nsu na ethoonyeryo yoopacerya, weso animwiiwelela Nsu na ethoonyeryo ya nenli.” Kahi vanci-enexa ethoonyeryo, masi Nsu naarowa ni yeeyo.

¹¹⁴ Moone, muYuta ole, owo aanisuwela etthu aahimy’awe. Owo khwira, “Kinnoonaka olamuliwa sa mmurimani, kinnoonaka ithoonyeryo, sootikiniha, atthu ohoona evonihiwaka, ni inamuna sothene sa ithoonyeryo soohiyana-hiyana, masi kaanitikinihiwa, masi vano kinnoona Nsu ottuli waya khaninrowa omuthikilasa Muluku ipantte tthaaru, ni wira, ‘Owo Muluku mmosa, Tithi, ni mukina, Mwaana, . . .’ Owo oniira, ‘Muluku ti Muluku: mikhalelo miraru sa Muluku; miteko mirarau sa Muluku.’” Khwira, “Eyo ennilihipherya.”

115 Oh, munna, hiyo nihaana Mutthaka! “Murowe, mwaahimeerye awiixutti Aka! Miyo nkaari *ule* okhwiye, ni *mukina* ori ntoko ookhwa, ni *mukina* ori mukumi. Miyo ka Yoole Aakhala, Onkhala, ni Ontthuna Orwa; Yoophuwa ni Nloko na David; Ettheneeri Yoowaarya ni Y’oxaka.” Ayo!

116 Emphwanyihani orowa, orowa, mwahaarine-ene etthu yo ohimya? Mukhalane etthu yo ohimya, ekhanle ekeekhai: “Yesu Kristu, Mwaana a Muluku, onnoophentani nyuwo othene. Owo ohookhwelani nyuwo othene. Mumphenteke Yesu Kristu Mwaana a Muluku.”

117 Akavi atonko okhala mmithukumanoni, khoona ithoonyeryo suulupale ni sootikiniha Sawawe—s’okhumelela Wawe, sa moota Owo onlamul’awe ni wooniherya, ni itthu? Owo ti Muluku a Wirimu, Yoole ohihimunwe mw’alipa-ookhwa.

118 Nyuwo mwaahaana woona ethoonyeryo y’ethoonyeryo ya eHeperi ya Yeeyo. Iwo Waarya, ntoko Nlumi na Mooro, nto memmo aakhala malepa mararu, Tithi, Mwaana, ni Eroho Yowarya, yaawo yahaakhanle atthu araru. Aari Muluku mmosa akhalaka mwa miteko miraru. Muluku mmosaru! Aleluya! Muluku vasulu vanyu, Muluku ni nyuwo, Muluku mwa nyuwo. Mmosaru yoowo eemereryaka Mwaneene, akukutthaka Ekereja Awe, wira Owo akhaleke-mo. Nyuwo mwaamuthikilasaka Owo kapatti-kapatti, n’umuhela mmosa *va*, nto mukina *va*, mmosa *vale*, eyo ti y’epakawu sinweryaney’aya okhala.

119 Miyo kinnaamini ohihimuwa wa Yesu Kristu, oohihimuwa mw’alipa-ookhwa. Ni Owo t’ari Mutthu mmosa paahi aawerya wira, “Owerya wothene Wirimu ni vathi koovahiwa mmatatani mw’Aka. Owerya wothene Wirimu ni vathi koovahiwa mmatatani mw’Aka. Murowe mulaponi mothene, mwalaleerye Ehapari yooreera soopattuxiwa sothene.” Ehapari yooreera kherwiiye ni moolumo paahi, masi ni owerya ni sowooniherya sa Eroho Yowarya. Muluku ookhaliheryeni waamini yeeyo, Muluku akikhaliherye waamini yeeyo, nto ninoomoona Yesu nihiku nlo.

Samalaru miteko sa makhalelo,
Vookiserya ninoomoona Yesu;
Vehiceni Vawe yooreera,
Owo onookiihana vooreera Owaani,
Nihiku namalaru. (Eyo ekeekhaii.)

Mihaava soorapihiwa munawoni
Mwa Mmalap’ole a ophareya w’oKalileya.

120 Awo yaahimwiiva Owo okhala wira Owo aaniikhaliha Muluku, nave Owo aari Mulukuu. Awo yaahimuthomeya Owo, okhala wira, Owo okhwiye ehukumu yo wiiva. Mwaha wa yeeyo kihinaamini aka ehukumu yo wiiva. Yesu okhwiye e—ehukumu ya ehukumu yo wiiva ya kuveerunu a ilapo so wiiraana a oRooma. Ehukumu yo wiiviwa, waari, othomeiwa vamwiikimanyo. Owo okhwiye ni ehukumu yo wiiva, oruliwa

ikuwo Sawe, khuthomeiwa vale, khimutakhalaha, vano Owo okhwiye mwa enamuna yeeyo. Masi Muluku khimuhihimuxa mmurotoni mwaya!

¹²¹ Nto hiyo n'anamoona Awe. Nto hiyo naahimweemererye Owo, ti pani onrowa omweemererya?

¹²² Mulopwana mmosa aahikirweela nihiku nimosa, khwira, "Oh, Munna Branham, muhimiyeke. Muhiye ohimya. Nyuwo—nyuwo munimwaanariha athiyana moonelo aya, mwaha w'awo okhalanaka maihi ookhuveya, ni mwaha w'awo wiiraka *ela* ni wira *ele*, ni sikina siiso."

¹²³ Miyo khwira, "Nyuwo mwahaahimeerye, t'ani onrowa waahimeerya? T'ani onrowa ohimya?"

Khwira, "Ahe, munimwaanariha alaleyi ale."

¹²⁴ Kaamwamputi awo okinanareela, ohikhanle Owo. Eyo ekeekhai. Ti yeeyo! [Nipuro vahiitthu mufiitani—Mol.] Khweeli. T'ani onrowa ohimya? Ohaana okhala mutthu onihimya.

¹²⁵ Yesu ohimye wira, "Murowe, mwaahimeerye. Murowe mwaahimeerye awiixutti Aka wira Miyo koohihimuwa mw'alipa-ookhwa. [Nipuro vahiitthu mufiitani—Mol.] Nto, Miyo kinookhala ni nyuwo mahiku othene, mpakha omala olumwenku."

¹²⁶ Munnaamini yeeyo, apatthani?

Nrowe nivekele, nuuramihe muru vano wira nivekele.

¹²⁷ O Muluku Tithi! Vekeekhai, "Murowe, mwaahimeerye. Murowe, mwaahimeerye awiixutti Aka wira Miyo koohihimuwa mw'alipa-ookhwa." Nto Muluku Tithi, kahi wira Nyuwo mwaarimwaahimeerya awiixutti Anyu paahi, masi Nyuwo mwaahiwooniherya wira moohihimuxiwa mw'alipa-ookhwa. Nyuwo mwaahisooniherya Mmansinyu wa yaawo, ni mwaahiira siiso ntoko Nyuwo mwiiraly'anyu muhinatthi okhwa. Miyaakha ekonto emosa ni imiya thanu na xexe sihoorwa khurowa, Pwiya, Mutthaka nlelo onnipaha. Owo nlelo ti wowaarya ni onnivaha mmurimani mwahu olelo ntoko waary'aya mw'awiixutti ale, maana hiyo ninniwoona Apwiya ahihimunwe eriyari ahu, yiiraka itthu Awo yiiraly'aya khalayi. Hiyo noosuwela wira Awo aahihimuwa mw'alipa-ookhwa.

¹²⁸ Paasikha onnihimya etthu vanci-ene wa hiyo, okhala wira nihitakanxa ni ninnipuha opatthana wa ohihimuwa Waya. Tthiri hiyo naatonko okhwa mutampini ni sootakhala ntoko mwaana namahonona, masi vano noophwanya mahala, ni Muluku oonilevelela itampi sahu. Owo oonivaha nave-tho Ekanyeryo, ntoko Owo saamwiirenly'awe Tithi Abrahamu, wira olipiherye wira oonikupali. Tithi Abrahamu aahihimya wira aanimwaamini Muluku, masi Owo khunvaha ekanyeryo ya olyihiwa masoma ntoko mulipiheryo wira owo aahimwaamini. Nto vano, Tithi, olelo noolyihiwa masoma ni Eroho Yowarya,

itthu sothene sa molumwenkuni soovira. Nirina etthunelo emosa: woorumeelani Nyuwo. Hiyo nirina yoothhuna emosa: woophentani Nyuwo, okhala mwiixutti Anyu.

¹²⁹ Nto vano, Pwiya, kinvekela wira Nyuwo mulipiherye mutthak'ola mukhaani woothikilaseya mwa khula murima. Wira awo ehialele. Mwaatthuniherye yoone wira Nyuwo mwa mmosaru nsana, olelo, ni mahiku othene, wira Nyuwo muri vaava, moohihimuwa mw'alipa-ookhwa, ni munookhala mpakha e—Eroho ni erutthu otakanxana-tho vamosa Orwa wa Nenli.

¹³⁰ Kinnaavekelela aretta ari va, Tithi, voosiis'ula. Kihaana vano, voosiis'ula wa Paasikha, siheliwe epante (ahiiso, kahi siheliwe epante, masi siheleliwe okathi mmosa) soovaha Nyuwo mukivahaly'anyu, ntoko olamula sa mmurimani. Olumwenku, miyo kinnirowaka n'utthika mulaponi, Pwiya, awo othene annisuwela. Vano kinvekela, wira, Mutthaka mukinnyaly'anyu nno mutakhwani, wira, mahiku vakhani avinre, wira, owerya iwe wo opattuxa onkhala mukereja mu voosiis'ula, mw'atthu ene yaawo opattuxiw'aya, miyo kinnivekela, Muluku, okathi onrwaaka owiixaatherya matata aretta voosiis'ula, ni munn'aka va, wira Nyuwo mukhuruwele ekerej'ela voosiis'ula, ni omoriwa ikharari, ni wira Nyuwo mwaavonihe atthu, wira ohikhale hata mutthu ootteetheya eriyari ahu okathi muteko ommal'aya. Khula mmosa a awo oreerihwe ni ovonihiwe.

¹³¹ Hiyo ninnisuwela, Pwiya, kehiyo hat'etthu naakhanly'ahu wiiraka mmansihu. Iwo waamini paahi ntoko wa mwaana, onaamini. Ninniweya owoona awiixutti vaamanly'aya ovahiwa owerya wira yaavoniheke aretta, awo yaahikhumasa ni yaahixinttiwa mwa mwaha mmosa wa ecile; ekhuwelaka ni enyakulaka, khino, ni etuphaka nno ni nno, ni yiilipihaka wira emukumihe xetwani ule. Masi vakumann'awe ni Yesu, oh, moota yaavirikanny'aya. Owo iirale, "Nyuwo erooho yootakhala, mmukhume." Ovirikana xeeni. Oh, owo aahisuwela wira ole khaari murummwa. Ale yaari Apwiya Mmansaya. Nto erooho eyo yaahimuhaaxa mmirav'owo yaanimurihela vathi. Masi Yesu khwira, "Owo khokhwiye. munvenxe paahi munvahe yolya." Erooho yootakhala yaahimuhiya.

¹³² O Yesu, Nyuwo Mwaana a Muluku, murwe-tho, muttikithele Ekereja Anyu mahala-ene, vowaatta, n'uwerya. Eroho ya Yesu mukumi ohihimunwe ehiximuxerye ekerej'ela yaamukhaani voosiis'ula mo waaminini musya, owerya, owerya wo waamini, wira nimphwanyihe ehaaya khula namavaanyiha. Munivahe, Pwiya. Kinnaavahererya atthu othene wa Nyuwo, ni woovekelani wira mwaareerihe ni mwaavahe woopowa wa minepa saya, ovonihiwa wa irutthu saya, mwa Yesu Kristu Pwiya'ahu.

133 Nto ni muru ahu wo wuurama, kinrowa okoha etthu. Ookhala mutthu iwo ohikhanle muKristu, aathuna wuupuweliwa vano, ni wira, “Mukivekelele, Munna Branham”? Muluku ooreeriheni nyuwo vo. Mutthu mukina tho, “Nkihiyo ka muKristu. Kihiiwa ihapari wira Yesu oohihimuwa mw’alipa-ookhwa, masi vekeekhai nkinsuwela eyo. Owo khonahihimuweke mmurimani mwaka. Nkirina ohakalala. Kinniwereiwa, nave. Kinoovira muliinyani mwa mavekelo, n’utthika nave n’uvira ekina, n’utthika nave n’uvira ekina. Kinoorowa ekereja ni ekereja, ni nipuro nnipuro.” Kahi yeeyo. Enkhala omwaamini Yoowo. Owo oohihimuwa mw’alipa-ookhwa. Eyo ennimaliha mwaha. Mutthu mukina-tho aarowa ovenxa ntata? Wira. . . Muluku ooreeriheni. Muluku ooreeriheni. Mutthu mukina tho, “Kintthuna kaamini. Kintthuna kaamini”?

134 Akavi anwereiwa mu, nvenxe ntata, mwiire, “Kintthuna kaamini. Kintthuna kisuwele Mutthaka voosiis’ula.” Muluku ooreeriheni. Ti yooreera. Ayo, Muluku ooreriheni, mwan’aka. Oreera. Vaareera.

135 Vano, Teddy, kintthuna murumihe “*Meetiku Muulupale,*” minuutu mmosa paahi, xontte, “vano ori vakhiviru.” Vano mwiiraka yeeyo. . .

136 Eyo ti yoorika vano. Soowoona sinookhumela mpaani mothene, moone. Ayo, kimpavela o, kaaphavela okhaliha ola wira okhale ohihimuwa, osulu vakhani, osulu vakhani okhuma va—vanikutthani n’ettuura kinikilaathaaka-vo. Kintthunaxa muupululo vakhani. Kinnisuwela etthu emosa; kaavarelelaxaka-ru mutek’ole woopacerya, wa nenli khunrowa orwa, khiwaarwiiye. Vano kaavarelelaxaka-ru wa nenli, wa neeraru khunrowa orwa, moone. Kihaana okhuma naanaanoru, okhuma ni waamini, “Muluku ohimnye siiso!” Mahiku vakhani avinre. . .

137 Vano mwiinuleke muru anyu vano mwatthuna vale. Kihaana matat’anyu; Muluku ohaana.

138 Kintthuna kooleleni etthu emosa yaamukhaani. Munna Ed Daulton, kookupali wira onoomala-ru ovolowa, munna muPatista ooloka, owo ni mwaar’awe. Munna Jeffries ori vaava nipuro nlo. Othel Jeffries. Ni owo ori vaava, koosuwela wira ori vaava nipuro nlo. Khula enamuna, axinna awo yaahitthokiha muthukumano mmosa wira kirowe, oKentucky wu. Axinna, axinna ooreerexa, anaaphenta anamwaattamanani aya ni atthu aya. Awo aakhalana mapuro oothukumana atthu ni ipa sinsukiwa ikaruma s’ekhotto ni itthu, wa muteko mmosa paahi w’okokhorela w’ohiyu, awo yaahirentteri ipa sinsukiwa ikaruma s’ekhotto. J. T. Hoover mwaamukhaani, hata wira yawawe. . . L. G. Hoover aahikhaliha emosa oElizabethtown. Ni Munna Ed Daulton oWillow Shade ahiiso—ahiiso Somerset, Somerset. Ni munna, munna mukina aari oGlasgow, weiwo oyariw’aka-

wo. Atthu weiwo oyariw'aka-wo ni oleliw'aka, weiwo Nlaikha n'Apwiya naakikhumelenly'aya emaara yoopacerya.

¹³⁹ Ni kaatthuna otthikela ottuli. Masi kaahoona okutumuliwa vakhani. Nto miyo khwira, "Ahe, mwaha w'axinna, kinootthokiha muthukumano." Vamanly'aka ophiya vakhatoni va, mmilo aka waahitthukeya naanaanoru ni nkaalavunle mwa mahiku mathanu na maxexe, mpakha mithukumano ovira.

¹⁴⁰ Munna Ruddell, siiso ory'ene vaava voosiis'ula, nave, mmosa w'axinna a etapernakulu yeela, owo ni Junie Jackson n'akina, kaahaana okhalana muthukumano wa yoowo. Nto naanaanoru mmilo aka khutthukeya. Nto naanaanoru, khuphwanya ettekuxa yooviha ntoko ikarawu emiya emosa ni thanu. Ni kaarowa vamuthukumanoni, toko, nto—nto Doc Schoen khukiirela . . . Miyo khwira, "Mmilo aka wookilala."

¹⁴¹ Owo khwira, "Kinimoovahani etthu wira etaphule mmilo mwankhaani, mukelele ohoolo mwalaleye." Vano khiwurya etthu ekena owo aakivahaly'awe, nto, yaari exeeni, eyo yaahipurulela nikusaku nle vathi khuttiyela. Vano khumpaathi voolilini mahiku mathanu na maxexe, ni ettekuxa yoovihaha erutthu saana.

¹⁴² Anci-ene w'axinn'aka va yaahirwa wa miyo, axinna oosuweliwa yaahirwa okivekelela. Aahirwa Munna Graham Snelling, aahirwa Munna Ruddell, axinna othene ala va, othene yaahithukumana mpaani, evekelaka ni itthu sothene sikina. Miyo kivekelaka, kiilipihaka voowerya waka, nkaawerya hata wiipulela. Miyo khuxanka, "Exeeni eniiraneya?" Amwaar'aka oophenteya ekilanthe-ene vale, awo n'akina ekivekelelaka, kaamutthikela kikhhalaka siiso. Awo khayaawerya osuwela saana.

¹⁴³ Vano, owo khukivaha murette mmosa wira kiwurye, masi nkaawunrye, okhala wira waari woohapala. Vano nto miyo khuhiya paahi. Vano miyo khukhala kuupuwelaka paahi, "Pwiya, vekeekhai!"

¹⁴⁴ Vano nto, simanly'aya mithukumano sothene, nihiku na Sekunta (owo waari, muthukumano wookiserya, waahaana okhala Saapatu), vano nto (kookupali), vano nto, Sekunta kaahehererya ovenya. Kaari ootteettheya, nkaawenrye ovolowa musaala. Miyo khukilaathi.

¹⁴⁵ Moosuwela, kinnixukhuru saana mwaha wa mwaara kivahiw'aka ni Muluku. Ankhi nyuwo, axinna? Mwaara eekeekhai, muxirikha eekeekhai!

¹⁴⁶ Miyo khukilaathi. Khimukwata, khukhala vakhiviru ni miyo. Nto miyo khwira, "Meda, imaara sikina kinniikoha," khwira, "Kinniikoha, exeeni enikhumelela." Miyo khwira, "Xeeni mithukumano iye saakhalenly'aya iwe, vano Muluku khukimpaatiha siisa?" Miyo khwira, "Yaakhalenle-ni yeeyo?"

Nto miyo khwira, “Imaara sikina kinniikoha sinto Owo ookiithana.”

147 Owo khwira, “Khamunuuliwa muru?” Munnona? Nto owo khukiirela, khwira, “Bill, khamunsuwela wira Muluku onnisuwela etthu Owo oniwiirih’aweni? Paahi, mukhale oopixa murima paahi.”

148 Vano nto miyo khuvolowa. Eyo yaahikipwapwela vakhani, moosuwela. Nto siiso miyo khuvolowa khumpaathi voolilini. Owo khuvolowa wira opatili mikhumi. Nto awo yaarina i— itthu mmoononi, vano vapacenry’aya, miyo kaahiweha, nto yaahikhala e. . .

149 Kaahoona em- . . . empa yuulupale ya ikaruma s’ekhotto, nsuwa naanry’aya nto khuphomolela vathi, khuphomowa kapatti-kapatti, nsuwa naaryaka okhuma Wirimu. Nto yaahirwa athiyana araru ni mulopwana mmosa, khuphiya. Nto awo yaakhumanse ntoko sikhaani, ntoko sikhaani. . . muthinto mmosa wa ikapwitthi sa ipholovolo, siiso. Nto owo khwira, “Ele ennikhomakela ipereku.” Nto khwira, “Hiyo nino. . . Nyuwo nvarele mapattuuxa ala, Munna Branham, nto hiyo ninootthikela wootekelani emp’ela.”

Nto miyo khwira, “Vaareera, kinimwiira.”

150 Masi etthu emosa khwira, “Muhiire.” Ahe, miyo khookola moonu wira kikuxe nipattuuxa, ntoko *sa*, wira niteke *sa*. Nto okathi ene yoowo Nsu nimosu khulavula ni miyo, khwira, “Vano awo ari mphironi wira yookuxeni muhokolowe. Muhaaminii.” Khwira, “Awoanaxariya saana, ni awo anoorwa ni SIISO ANIHIMYA T’APWIYA, masi t’ovonya.” Munnona?

151 Fred Sothmann, anci-ene a awo va, yaari weiwo okathi waahimenry’aka yeeyo. Voohivira ewoora emosa, atthu khuphiya vamukhora vaka. Miyo khwira, “Aakhala athiyana araru ni mulopwana mmosa.”

“Eyo vekeekhai ekhweeli.”

“Awo anoorwa ni SIISO ANIHIMYA T’APWIYA?”

“Ayo, mulopwana, awo. . .”

152 Miyo khwira, “Vekeekhai, nyuwo moosuwela yo waahimeerya.” Oovonya mwa exariya, moone. Atthu ooreera murima, masi oovonya mwa exariya. Munnona?

153 Vano miyo khuupuwela, “Ahe, kiireke exeeni? Kihaana wira exeeni?” Vano nto Meda khuvolowa, nto owo aarootthika. Nto Munna Freddie khurowa waaleela atthu. Vano nto nuvira okathi vakhani, kaari memme vo—voolilini, nto khuupuwela, “Xeeni wiireyaka siisaale? Xeeni kihinwery’aka olavula? Xeeni ohiweryaka olavula ni mutthu, wala etthu?” Nto miyo kampaathale vale. Vano Meda khuvolowa, nto aathikela ota wa saala.

¹⁵⁴ Nto miyo khuweha, nto kaahoona etthu waaphila epantte emosa. Nto miyo khuweha, nto yaahikhala ela...exiri aka khutthukuwa, nto miyo khumoono Yesu. Akavi a nyuwo atonko okiwa ohimya wira koomoono Yesu imaara piili mwa makhalelo aka, muhina mwa yoowoona? Ni kaahikupali wira kaammoonatho ohinatthi okathi wa woomalelani, moone, omoonatho Yoowo. Vano, miyo khuweha, nto erimu yaari weiwe, yaakhala ntoko wira kaaweha varyari v'exiri. Nto aahikhala Bibilia aaphwanyaneya ntoko *sa*, Bibilia muulupale eemenle musulu. Ahe, yaahikhala etthu yammwaleela Bibilia, nto ota wa Bibilia khurwa mwiikimanyo w'eekhai wooreera wa eweero. Nto aaphwanyaneya vate ntoko *sa*, vano mithuko sirwaaka simurukureryaka, nto vamwiikimanyo vale Owo aamweetta. Bibilia aanooniherya mwiikimanyo, mwiikimanyo waanimooniherya Owo. Vano Owo khurwa eettaka, nto khewetta mpakha vaavo vene kaary'aka-vo. Kinniweya woona oratteenexa, kinniweya woona mwiikimanyo ole wooneelaka maihi Awe eemenle-ene vale, othomeiwale-ene wiitho Wawe.

¹⁵⁵ Owo khukiweha miyo vathi *siisaale*, nto Owo khukiirela, "Munwehererya muteko anyu musya olipiheriwa wa nyuwo." Owo khwira, "Miyo koomala woolipiheryani yoowo. Owo woolipiheriwa. Muhaana okupali." Munnona? Nto miyo kweemela khumwiwelela Yoowo minuutu mmosa paahi. Vano khurwa mmuruni mwaka. Miyo nkiiwale eyo, erimoorwa mmuruni mwaka paahi.

¹⁵⁶ Ntoko mutthu otonko okhala natampi makhalelo awe othene, ni onsuwela wira ookhala Bibilia, onsuwela wira ookhala Muluku, masi naanaanoru khunaiwa mutthaka, vano Etthu emosa enamuleela, "ti nyuwo." Vano, Masu ene yaawo annikhalaka vaavale okathi wothene, enamwi elipiheriwaka wa yoowo, vano owo khunaira, "Pwiya, mukilevelele." Masi khanrowa omphwanyiha yooreera mpakha owo okupali woopoliwa wawe, vano onookhuma khukhala muKristu. Hata wira oninla sayi, hata wira onxonttela sayi, owo ohaana okupali Iyo.

¹⁵⁷ Ni Owo aahikileela nto, "Muhaana okupali enamuna emosaru. Muhaana waamini."

¹⁵⁸ Kinnoova oxinttiwa. Etthu p'itthu, kinnoova oruha ehaaya. Miyo kwekwe kinnoova, kiwehaka, wuupuwela wira kinimwiihana etthu yoovonyeya. Okhala wira, kookuxa olopola wa Bibilia, moota Moise aavahiw'awe owerya wuulupale, nto khumana mwala ohiya ohimeerya. Kinnimuupuwela Eliya, okhala wira owo aahirowa ni ntari, anamwan'ale khunanveeha mwaha w'okhala nantari; vano owo khwaatakhalaha anamwan'ale, nto miloko mixexe n'anli a yaawo khwiiviwa ni ekhaya, moone. Nto ele khiyaari Eroho Yowarya, masi aari profeta, aananariwe. Nto ko—koovira mwa itthu sothene, khiphiyeryaka yeeyo.

159 Nto Owo eemenle vale, alavulaka ni miyo. Nto Owo khwira, “Masi nyuwo munneettana anci-ene.” Owo khwira, “Weetta ni Miyo, munrowa weettaka meekh’inyu.”

160 Kaahoona nto wira, nkinreereke ocalela vanci-ene miromolelo ni itthu sothene, moone, mutthu omphavela wooleelani etthu yo wira ni etthu yo ohiira. Nyuwo muhaana omutthara Owo. Vano, muupuwele yoowoona Owo aakivahaly’awe ya ihopa, moosuwela, ni moota mwahaakhanly’anyu owiixuttihaka ithoonyeryo sa wirimu anamwane aPentekosite. Munnuupuwela. Nto eyo yaari vale. Nto miyo kiri vamukalani wa Mutthak’ola musya.

161 Vamanly’aya okihiya yoowoona, miyo khwira, “Amen, Pwiya!” Nto amwaar’aka yeemenle vale, ehalaka ohileya. Vano miyo khutupha vooilini, kaaniwerya olavula saana ntoko saatonko aka wira. Mwa esekuntu emosa, ettekuxa yothene yaahikihiya.

162 Miyo khumwiihana Doc Schoen, miyo khwira, “Kaatthuna wira mukiwehe.”

Owo khwira, “Exeeni?”

163 Nto miyo khurowa iwe, vano owo khukiwehaweha, khuweha mphulani mme, khwira, “Mukileele exeeni ekhumelenle, Munna Branham.”

Nto miyo khwira, “Mwammwaamini wahala aka?”

Owo khwira, “Kaakhanle ohoveriyaka sayi? Ehiiraneya.”

164 Ti yeeyo, moone. Ti yeeyo, mpatthani. Muluku onnisuwela moota wo woovarelelani vanikutthani n’ettuura. Owo onnisuwela moota wo owiirelani etthu mpakha Owo owerya okeliha Mutthaka mwa nyuwo, moone, wira mphiyerye wira etthu.

165 Olelo, nkinsuwela oxinttiwa xeeni. Miyo kaahikela woohikhala khalayi, kaamwiiwa raatiyu. Nto aahikhala murumeyi mmosa aalaleya ohihimuwa, opacerya aKorinto Oopacerya 15. Nto owo aalaleya ohihimuwa. Nto owo khweemela eriyari ya mutthaka awe, nto owo khwira, “Moosuwela, athu anci-ene annoova oxinttiwa.” Owo khwira, “Okathi Mukhulupale a anakhotto Patton yaamupweteiy’awe atoropa,” khwira, “vano awo khimuhimeerya. . . Owo khwaahokoloxa ni aanaatthuna akina-tho, vano khuveleeliheriwa akina-tho. Awo khwiwiwa, nto owo khwaaveleeliha akina. Nto wawaakhenly’awe nikhuru na neeraru iwe,” khwira, “khula okathi epholovolo yaarum’aya, awo yaatthyawelasa vathi va laatha, wala otthyawela vathi v’etthu ekina, ootuthuwa.”

166 Owo khwira, “Mukiveleeliherye alopwana, kahi anamwane.” Owo khwira, “Kinaatthuna alopwana ari oolikana wira akhwe. Nkimmutthuna mutthu onoova okhwa. Vakhala wira niwoko

ninwanel'ahu khanimpfwanela okhwela, weso mwaakhalihe ottaiwene wa miyo. Miyo kinaatthuna alopwana.”

Awo khwira, “Masi mooxinttiwa ikhotto piili wala tthaaru.”

¹⁶⁷ Owo khwira, “Miyo nkixinttiwe ekhotto. Kixinttiwe ewanelo emosa paahi.” Etthu emosa khulavula mmurimani mwaka.

¹⁶⁸ Kinnuupuwela wira Eisenhower iirale, “Kaarihaka epholovolo, kaaniruma vano yaanirihiwa ecupu emosa mukapwitthini, yaanikumihwa vano waari osonya, khiyaavara muteko,” khwira, “Miyo nkaahiya ni wiiveleela. Kaamurihela epholovolo n’uhela-mo ekina, ni wehererya. Yaahivare muteko, kaahela-mo ekina, mpakha evare muteko.”

¹⁶⁹ Ti siiso erin’aya wiiriwa. Nkisuwenle moota enrow’aya okhala. Masi Muluku ntoko Mphuki aka vapulpitu va, nkinsuwela isonyelo kavi ni kavi—iwanelo kavi kinrow’aka oxinttiwa, masi nkinrowa oxinttiwa ekhotto. Owo okihimenrye wira aamukhala ni miyo. Miyo kinookhala mpakha koone mutek’ole olipiheriwa ni woona ovaraka muteko. Kimpacerya voosiiu yoola, ni mahala a Muluku. Nkisuwenle sinto onrowa ovara muteko va, sinto onrowa ovara muteko nipuro nikina, moota onrow’aya ovara muteko wala etthu enrowa okhumelela. Masi kinoovira muliinyani mwa mavekelo, kaavekelelaka aretta, mpakha kisuwele etthu eniiraneya. Kihooona eyo ovara muteko imaara piili wala tthaaru.

¹⁷⁰ Kihooona eyo wiiraneya owannyawe Hattie. Akavi atonko wiiwa ehantisi mwaha wa ikhopa, ni mwaha wa mwali, mwaamuthiyana? Mutthu oopacerya wa othene okhuma vasuwenly’ahu, okhuma mahiku a awiixutti, yaavahiwe ehaakhi yo wira, “Nvekeleke entthun’anyu,” mwakhala weiwo. Mootoko wiiwa ehantisi ene? Mootoko omoona muthiyana ene? Akavi atonko omoona, ni anthhuna, yaatthuna omoona muthiyana yaamukhumelenle? Hiyo . . .

Hattie, mwaamutthuna ovenya? Ole vale muhano ene.

¹⁷¹ Keemenle-ene owannyawe. Vaamanly’aka woona ikhopa thanu na tthaaru, vekeekhai sahaakhanly’aya hata emosa hata nipuro, nto, olavula nsu, nto saamukhala vale. Eyo ekeekhaii. Eyo ti wi, saahikhala vale. Nto miyo khwira, “Exeeni yairihale ikhopa iye orwa vale?” okilante-ene vameesa vawe. Ni ame awe, Munna Wright muthiyana, va ori Munna Wright, aakilante vaavo. Akavi yaari vameesa, akavi ari va voosiis’ula? Nvenxe matata. Ahe, ale vale, mpaani mothene. Munnona? Vaareera, awo yaari weiwo. Nto miyo khwira, “Nihiku nlo . . .” Muhim’aya oorakala okilante-ene vale.

¹⁷² Miyo khwira, “Ehaana orwa ni yoowoona, siiso, masi nihiku nlo enimoorwa vovirikana.” Kaalavula siiso. Naanaanoru, Etthu emosa khuttikitthela eyo (mwaahiyerye eyo atthu ala), nkinatoko woona muttikitthelo yoowo. Mwaha wa xeeni? Okhala wira Hattie aarohimya etthu yooloka.

173 Miyo khwira, “Ikhopa iye sikhumale woowi? Khiyaakhanle hata emosa vale, hata nipuro nimoso na seiyo, ntoko nripu na telefooni vale. Kihoona wiiraneya imaara thanu na tthaaru soottharana.” Nto miyo khwira, “Nkisuwenle okhummy’aya-wo.” Miyo khwira, “Etthu emosa paahi kinsuwel’aka, wira emaara emosa Muluku aahiphavela olipiherya Mutthaka wa Abrahamu, nto Owo khulavula wira ekhale epwittipwitthi, okhala wira Owo aanitthuna epwittipwitthi, wira alipiherye Yoowo. Yaahaana okhala mwaha wo wira kaaniphavela ekhopa, wira kilavule yawaka. Nto Owo ohiira imaara thanu na tthaaru soottharana, ahiiso imaara thanu na piili soottharana, kiireke, imaara thanu na piili soottharana.” Nto miyo khwira . . .

174 Nto, Hattie, khino ahisuwelaka etthu muthiyana aahimy’awe. Nkawehani moota Eyo yaaxeremaly’aya mathaaciri ni owiisoona. Nkawehani moota Eyo yaaxeremaly’aya sothene, khimurweela muthiyana mmosa a mukuluttuni iwe.

175 Ni kaahikhalana itoolare miloko miili mpoolosani mwaka, wira kimuhokoloxerye muthiyani’owo, wira, owo aahilaiherya itoolare miloko mithanu ekerej’ela esya yaakhumelela. Nto nkinihimya ela wira emuukhule; owo khaawerya ophwanyisa isentavo miloko mithanu, vekeekhai, wira avaha. Masi, murim’awe Mmutthakani, owo aanitthuna. Munna Neville, kookupali, aahikupali, khaarowa okuxa ole waahalela, aamutthunihenrye ovaha paahi itoolare miloko miili wa yoowo. Nto miyo kaahikhalana makukhu manli a itoolare muloko mpoolosani, Meda aakivahaly’awe wa soolya, nto miyo khwira, “Kinrowa omuhokoloxerya olelo.”

176 Vano khuupuwela, Etthu emosa khukiirela, khwira, “Yesu aahimoona naamukhweli ule ahelaka-mo isentavo sawe tthaaru, nto Owo khaamwaakhale khuhokoloxa.” Owo aahimuhiya arowaka okhala wira Owo aahikhalana etthu yuulupalexa mphironi.

177 Kaasuwela vakhani wira Owo aalavula ni miyo enamuna emosaru, ya muthiyana naamukhweli, ahaarina iya. Iy’awe aarimwiiviwa. Nnakhala nkaasuwela wira ole aari Yoowo, okathi wiiraly’aka, “Vano kinoosuka itoolare miloko miili, Nyuwo muhaana etthu ekina ya yoowo.”

178 Miyo khwira, “Etthu emosa paahi ensuwel’aka, wira Yehova nlelo ti Yehova-Yire. Owo onniwerya ovaha mukuttho.”

179 Nto Hattie, ahisuwelaka etthu aahimy’awe, aahivenya khwira, “Eyo kehiyo hat’etthu woohikhala ekeekhai, Munna Branham.” Oh, wulu! Eyo yaari etthu yooreera ohimya. Eyo yaari etthu yooreera ohimya.

180 Okathi ene yoowo, Owerya wa Muluku waahiphiya nipuro nle; nkaatonko wona muttikitthelo ntoko ole. Vairaly’aya, miyo khwira, “Hattie, SIISO ANIHIMYA T’APWIYA, nvekele

etthu entthun'anyu! Nkincala wira exeenii, Muluku ookivaha ehaakhi yo woovahani entthuna murim'anyu naanaano va. Mwavekela itoolare emilyawu, munimwaakhela. Ovekela wira mwali ule oorakala avenye eette, owo onimwaakhela. Ovekela etthu p'itthu ekena."

Owo khwira, "Kivekele exeeni, Munna Branham?"

¹⁸¹ Miyo khwira, "Etthu p'itthu entthun'anyu. SIISO ANIHIMYA T'APWIYA." Oh, moonelo xeeni!

¹⁸² Owo khuwehaweha. Vale yaakilanthe t'atith'awe a maihi ootweelela yaahalenle okumihiwa, mookhwaani. Vale yaakilanthe ame awe owuuluvala, ewereiwaka. Vale aakilanthe, muhim'awe oorakala.

¹⁸³ Masi owo aathanlale ele yaari yooloka. Aahikhalana an'awe aili aximiravo mwa munnuwelo yoole woohitthokelela. Aiy'awe oophenteya yaahirowa Moovuwani; owo aari muKristu, alipelelaka. Masi aximiravo khayaari aKristu. Owo khwira, "Minepa s'ana aka anli." Muluku areerihe murim'awe.

¹⁸⁴ Miyo khwira, "SIISO ANIHIMYA T'APWIYA, muhaana."

¹⁸⁵ Nto awo arisa va, aapatisiwa mo Waamini. Awo yaanikileelasa ohiyu uwo, hata, mwammirav'ole mukhaanixa aarapiha inawu sawe mme, ohenle-ene matat'awe vamuru va Munna Neville, anvekelelaka okathi waarapih'awe inawu.

¹⁸⁶ Aximiravo awo anli khino akilaathanse vaava vamuthukumanoni nipuro nlo voosiis'ula. Aakhala, Hattie, arisa vaava ni nyuwo? [Munna Hattie muthiyana oniira, "Arisa ottuli iwe."—Mol.] Ottuli, ottuli. Murisa woowi, amiravo? Nvenxe matata. Arisa woowi amiravo awo anli? Ale vale, yeemenle-ene ottuli wu. Muluku ooreeriheni. Vaareera. Awo vo.

¹⁸⁷ Vano, exeeni yiiraneieye? Etthu ene yeeyo, hata wira exeeni, owo aamukhalana yiiraneieye...etthu aarow'awe ovekela, aamuwerya waakhela. Aamuwerya waakhela.

¹⁸⁸ Vano kinnitthuna woona eyo wiiraneia. Onrowa okhala mweettelo w'atthu vootthariha Mutthaka. Munnoona moota owo aahimaly'awe? Owo aahimyale etthu yooloka. T'ile enihimy'anyu, eniira. Ele enihimy'anyu!

¹⁸⁹ Nkanweheni muthiyana a oSirofeniisiya varwiiy'awe wa Yesu. Owo iirale, "Pwiya, mwan'aka muthiyana onoohaaxiwa vanci-ene ni xetwani. Nyuwo Mwaana a Davidi, murwe munvonihē."

¹⁹⁰ Owo khwira, "Khivanreerela Miyo okuxa yoolya y'ana khunaavaha alapwa."

¹⁹¹ Whish! Ankhi Owo aamwiirenle yeeyo mmosa wa hiyo? Hiyo naamwiira, "Munikiihana mwalapwa? Hah, khiyaari hat'etthu wa Yoowo, khula enamuna! Ekereja yuulupale ehaana exariya. Owo kahiyo hat'etthu woohikhala santu oophirikeya. Owo

kahiyo hat'etthu woohikhala Pelizepuli." Hiyo naamukhalana mweettelo yoowo. Masi kahi owo.

¹⁹² Owo iirale, "Ekeekhai, Pwiya. Nyuwo vekeekhai mookhalana exariya. Masi alapwa annitthuna olya itathela vathi va meesa a aana."

¹⁹³ Eyo yaahinvara murima Owo. Owo khwira, "Mwaha wa nuulumo nla, xetwani oomuhiya mwan'inyu. Mwaha wa nuulumo nla!"

¹⁹⁴ Ti mweettelo anyu, apatthani. Owo khohimye eyo? Muhaana waamini, apatthani. Nyuwo, muhikaamini miyo, miyo ka mutthu; masi mwaaminiki ile enoohimery'akani, mwaaminiki Mutthaka. Mwaahimwaamini namitthaka, mwaamini Mutthaka. Vaakhanle wira mutthu aanvolowa musaala mme, ni ewarakhha, hata wira ti pani, aalikana okhala mutthu xeeni wala hata aari pani, muulupale wala mwaamukhaani, mwaamini ele eri nwarakhani, kahi mutthu ene. Muluku oookiruma wira kooleeleni. Kihaana Mutthaka. Muluku ookiruma wira kooleeleni wira Owo oohihimuwa mw'alipa-ookhwa, wira Owo ori vaava voosiis'ula. Owo ohooniherya ni ithoonyeryo ni sootikiniha, wira Owo ori vaava, ni khula mmosa a nyuwo munoowerya ovonihiwa iretta sanyu mwakuxa-ru mweettelo wooreera paahi mwaarwaaka. Munimwiira yeeyo, okathi oniip'ahu *Waamini Paahi*.

¹⁹⁵ Vano ale anrowa ovekeleliwa, erwe nno ethataane vaava va. Vano, muhirwe vahikhanle wira munimwaamini ni murima wothene.

¹⁹⁶ Pwiya ooreerexa, ola p'ukathi. Kinvekela wira Nyuwo mwaavonihe atthu ala, Pwiya. Ni mureerihe makhura ala. Okhale ovuwa Wanyu, Tithi. Hiyo ninveleliha ala mwa Nsina na Yesu Kristu. Amen.

¹⁹⁷ Kintthuna osuwela sinto naamuwerya waavekela atthu ale yeemenle epantt'ila nno, yaakhanle-ene enamuna vanwery'aya okhalana opuro vakhani nno, wira niwerye waakuxa atthu eviraka, mwawerya vale. Vaava va, ekhumelaka epantt'ile. Vano anoowerya othene orwa epantt'ila, ekeleka muliinyani, wira eliinya emosa ekhumeleke epantt'ile iwe.

¹⁹⁸ Etthu ehaana wiiraneya, Munna Neville. [Munna Neville oniira, "Amen. Enimwiiraneya naanaano va. Attotopeliwe Apwiya! Yesu ori vaava. Ayo. Khula mmosa a awo onnivonihiwa ni Owerya wa Muluku."—Mol.] Amen.

¹⁹⁹ (Munihimya-ni? Khweeli . . . Ahe, nnari, vaavo vo tu. Munna Neville ni miyo, ayo, ninrowa waavekelela ale wookiseryani iwe. Tivo, muhaaruuheke epantt'ila, okhala wira mwaamu, mwaira vale, munrowa o . . . Minuutu mmosa paahi . . . ? . . .)

²⁰⁰ Vano mukihye kaahimeerye atthu anlipelela: *Ala* ti Masu a Muluku, Yoowo miyo . . . Mwaha wa yaawo kinkhal'aka, ni

kinrow'aka okhwa-no, ni mahala a Muluku ni mukhaliheryo. Muluku okhanle Mphuki aka muulupale, miyo koohimenryeni Ekeekhaii. Kihoona, ni itthu iya sothene sirwaaka mwa yeela. Hata wa ehopa yaamukhaani yahihimuxiwe iwe, mootoko omwiiwa wahala ene yoowo? Vale ori mulopwana ene ottuli iwe, oowanli aya, yaari weiwo okathi waakhumelenly'aya; kaahaaleela nsana naya ehinatthi okhumelela. Vano, kinwerya sayi wooleelani itthu iya sikhhanle? Moone, kintthuna olaleya, nihiku nlo ohiyu, mwaha wa *Olikanyiha elemelelo*. Mutthu aamuwerya woohimeeryani etthu, ni otthikela atekaka siiso, masi yaahikhale hata Yoolempwa wira elikanyihe elemelelo yeeyo, vookiserya enookomowa. Vakhala wira osuwela nno sa mmurimani, ni sowoona iya ni itthu koohimenry'akani, iyo sahaakhanle Ekeekhai; yoopacerya, ookhala Bibilia wira okhaliherye, ni yaahikhala Eroho Yowarya wira yooniherye wira kihimnye Ekeekhai.

²⁰¹ Vano, kookhala miyaakha soophiyaka muloko ni mixexe vapuwani, ni khula namuulumela aakhanle ophwanyaneyaka ohoolo waka. Oosoma, oosuwelaxa, itthu sothene sikina, khuuvo hata okathi mmosa awo yaawenry'aya . . .

²⁰² Nto munnisuwela etthu yaahimy'aya? Nyuwo muhiiwa eyo vaava. Awo aniira, "Aththu nipuro noothukumana anorowa, olavula n'atthu." Voopacerya awo yaahimya wira yaari atthu a mukereja mwaka, yaawela vale wira yiirihiwe. Vano khuhiwerya osuwela saana eyo, yaahikhala anci-ene a yaawo.

²⁰³ Etthu yoottharelana awo khwira, wira, "Yaarowa okhala ntoko axinna" anrowaka ni miyo, "awo animweemela ottuli iwe ni wira, 'Mulopwan'ola ohaana eyiiwelo, owaruni wawe.'"

²⁰⁴ Vano awo khwira wira, "Billy Paul, Billy Paul aamoorwa ni—n'uwela iwe n'usoma vattikittini, ele atthu anihimy'aya. Yakhala etthu evonyeiye ni maaru aya, owo aamwiira, 'maaru aya' wala 'napwiipwi aya.'"

²⁰⁵ Ankhi yaarowa okhala sayi ale ahirina ittikitti sa mavekelo? Ankhi iyo oweryaka ohimya khalayi ene itthu sinkhumelela oratteene? Yaarowa oweryaneya sayi okhala siiso? Khiyaakhanle okhalaka. Mutthu ti mutthu onnisuwela, ale arina muupuwelo aya wooloka.

²⁰⁶ Aththu yaahimya etthu emosaru mwaha wa Yesu, okathi Filipe aaronw'awe khimukuxa Natanayeli. "Owo aari mpatthani a Yesu." Owo iirale, "Vekeekhai, owo aahimuleela Yesu sothene sa yeeyo. Owo onoomurowela."

²⁰⁷ Vano nto awiixutti yiirale, ahiiso awiixutti ale a ekereja yuulupale yiirale, "Mulopwan'ola Pelizepuli. Owo Pelizepuli. Owo nahakoo."

²⁰⁸ Yesu khwira, "Miyo kinimoolevelelani mwaha wa yeeyo. Masi nihiku nlo Eroho Yowarya enimoorwa wira etthu emosaru,

nuulumo nimosa noovirikanya Yeeyo khaninrowa oleveleliwa.” Vano vakhala . . .

²⁰⁹ Miyo kinnikhalaka a xariya ni nyuwo atthu, a xariya saana ntoko saasuwel’aka moota wo okhala. Oh, siiso kivirikannyene ene inamuna so waamini kamosa-kamosa sirin’anyu mwa teyoloxiyya mwaamukhaani ni itthu. Masi, etthu eniirel’aka yeeyo, Paulo ohimnye wira, “Nakhala Nlaikha ninkhuma Wirimu ninrwa n’ulaleya etthu ekina yoohikhala ele Bibilia enihimy’awe,” ni etthu owo iixuttihaly’awe, “nitakhaliwe.”

²¹⁰ Vano, kihaana otthara paahi ele Bibilia ehimaly’awe. Vakhala wira Bibilia oohimya, “Owo mmosaru nsana ni mahiku othene,” kinaamini yeeyo. Vekeekhai sothene Bibilia ohimaly’awe, vekeekhai ti yeeyo tu enaamini aka. Miyo kinihimya eyo siiso. Miyo nkisomme, nkikhalanne hata exuttiheriwo. Miyo kiiwelenle Eroho Yowarya paahi ni Bibilia. Nto mpakha va, mpakha voosiis’ula wa Paasikha, mwa miyaakha miloko miraru ni mmosa, Owo khonakiwokeke.

²¹¹ Ni kinooleelani wira Eroho Yowarya yaahikileela ya muteko owo orwaaka, mwa miyaakha miili wala miraru sivinre, ni kinnihimeeryaka ikereja mapuro othene. Nto Muluku Oowerya sothene okhanle Mphuki aka, wenna nno epant’ila ya oSalem, ikhopa iye saahikhala vaavo sahaakhanle-vo ikhopa. Weiwe wene ni Charlie, neemenle-ene ottuli iwe, ni anci-ene aya ohitto nno oKentucky; ikhopa iye khurwa mapuro yaawo sahaakhanly’aya-vo, khuhimya nipuro saarow’aya okhala. Vaavo Tony n’akina, Banks, yaakilaathanse vaavo. Nto yaari vaavo, voolikana. Khurwa naanaanoru, nto mutthu oopacerya aatonko ohimmwa, aari muthiyan’ole okilantho vale, nto eyo vo. Voosiisu uwo iwe, okathi waawereiw’aka ni mukhalel’ole wa mmilo, kaahimoona Yesu eemenle-ene ohoolo waka, nto Owo khukileela wira muteko ene koolipihereleliwa.

²¹² Vano etthu eri wira ekhumelele, nkisuwenle. Masi, etthu emosa, kihaana ohiya mukina, wira kikele mwa yoola. Enamuna emosa paahi ensuwel’aka wira. Esuweliwe vano. Ela eheliwe mmuruni, ntoko Yobi sihimaly’awe voosiis’ula, ni ekaneta ya yuuma, vamwala. Nkinsuwela yo wira. Etthu emosa paahi ensuwel’aka, okelela ohoolo. Owo aahikileela. Nto Muluku ti Mphuki aka, Owo aahikileela. Miyo koolenleni Ekeekhaii. Nto vakhala wira Muluku oolipiherya ni wooleelani, ni hata okathi mmosa mutthu va okhanly’awe ohela ntata v’etthu p’itthu yaakhanle yoovonyeya, vano ela ekeekhaii, nave. Ela ekeekhaii, nave.

²¹³ Vano kaarowaka va ni weemela woomalelani w’eliinya. Miyo kinkhalana humu, Munna Neville vale, mutthu ooreera murima, pastore ahu va, wira aattikitthele makhura atthu. Kinrowa owiixaatherya matata atthu, okhala wira oruma wa Yesu,

numala Paasikha, waari, “Murowe mwawiixaatherye matata aretta, awo anoovona.”

²¹⁴ Nkisuwenle etthu Owo onrow'awe okileela muliinyani. Kinrowa ophavela wona muttikithelo owo muulupale. Nkisuwenle exeeni enrowa wiiraneya. Nkisuwenle. Etthu p'itthu, kinrowa wira paahi ntoko Owo sinkihimeery'awe.

²¹⁵ Vano murwe, murwe ni murima woosareya. Hata wira Owo onimooopwapwelani, Owo onoohohimeeryani etthu, hata wira exeeni, murowe mmuxukhuruku Yoowo, moone. Okhala wira, muteko woovariwa, eyo enamuna emosa wo ophiya wa nyuwo.

²¹⁶ Vano, munna, ni mwetto owo, kinthuna wira mwaamini. Vakhala wira Owo, ni telefooni, aahiwerya wookumihani erett'ele ya napwiiwpi mwa nyuwo, Owo aamuwerya okumiha mukhale'owo wa mwetto mwa nyuwo voosiis'ula, moone. Vano mwaamini ni murima wothene.

²¹⁷ Nto muhano orina ttutthu ule aarina eretta ya murima, muhioverye-tho. Mwaamini! Mwaamini!

²¹⁸ Vano kintthuna wira atthu othene mukereja evekeleke. Nto kinrowa vathi kavekele. Othene anyu mukhale nvekelaka vano, okathi onruuh'aka eliinya ela ya mavekelo, kivekaka, kiixaatheraka matata paahi vo ni ohimya eparakha.

²¹⁹ Nto, muupuwele, akhala a nyuwo orina etampi yoohilampwa, ekhale yoosuveliwa wira Muluku khonrowa woovonihani ni etampi iyo yoohilampwa. Mulokiherye, muhinatthi orwa ovira va, okhala wira pooti wootepihani. Munnona?

²²⁰ Vano kehiyo mwa olamula sa mmurimani. Olamula sa mmurimani, miyo kinoottemulela itthu iyo. Masi, mwa ela kuhiyo olamula sa mmurimani, kimpavela muteko musya. Othene anyu munniiwa saana? Vaareera. Vano mwaamini.

Vano nrowe nivekele nuuramaka muru ahu.

²²¹ Muluku Tithi, maravulo a ikatha saka nlelo ari vapulpitu va, mwa iwoora n'iwoora sene, maana vano miyaakha soophiyaka miloko miraru wala ovikana, kinkhal'aka wa kilaleyaka, ni mulaponi mothene. Ni Nyuwo munnilipiheryaka Ehapari yooreera kinlaley'aka, okhala wira Mutthaka okhumme wa Nyuwo. Miyo nkinaroweke hata exikola, nkinamukoheke mutthu woohikhala Nyuwo, kisomaka Masu Anyu ni olipelela wona etthu Eroho yaarow'aya ohimya wira kiire.

²²² Nto vano, Pwiya, Nyuwo munnisuwela sa mutek'ola wa Marku 11:23, ni kisuwelaka wira okathi ori vakhiviru, kisuwelaka wira v'exariya koohimya mwaha wa ikhopa iye, ni sa Munna Hattie muthiyana ni an'awe. Vano, Tithi, kisuwelaka wira yoowoona ele yaahikirweela vale vooilini, voosiis'uwo. Kaahimoonna Bibilia ole, vano nto mwiikimanyo, nave tho

Nyuwo. Ni yaahuupululeliwa mmuupuweloni mwaka wira kihaana okupali, okhala wira woolipiheriwa.

223 Vano, Pwiya, kinnikelela ohoolo voosiis'ula mukereja mwaka, wira keemele va wa voosiis'ula wa Paasikha, kivekelaka wira mukivenxerye yoovaha ya naanaano, yooweryaxa, mwaha w'atthu, yooweryaxa. Kahi mwaha wo woopowa waka; okhala wira Nyuwo, mookoopola, Pwiya. Kahi wa miyo; miyo kookhotta ithu sothene suulupale, wira koosuweleni Nyuwo. Ntoko Nyuwo sikhimeeraly'anyu iwe emp'ele y'olompa yuulupale, nihiku nle, "Miyo ka mpantte anyu." Vano, Pwiya, mukihye kikhale mpantte Anyu, wira kiphwanye ocaliwa wa Nyuwo, wira Eroho Anyu erwe mwa miyo. Ni wira kawixaaatherye matata atthu ala, ooreerexa anihaawa, Eroho Anyu, Pwiya, evare muteko onihaleela. Eyo ti yothene ensuwel'aka wira, Pwiya.

224 Kinnuupuwela orummwa waka, miyo "Kiyariwe wira kaavekeleleke aretta. Muwaaminihe, ni mukhale naxariya mwaavekelaka." Pwiya, miyo paahi. . . nkinsuwela moota wo okhalaxa naxariya. Miyo—miyo. . . Awo anoohaawa, Pwiya. Ni miyo—miyo kinnihaawaka, yoomi. Xontte, Muluku Ootthuneya, nvaherye wira avonihwe, khula mmosa.

225 Kinookelela ohoolo vano, Pwiya, ni waamini, ntoko Moise eettaly'awe arowaka Ephareya Yooxeerya. Miyo kinnikhuruwa okhuma vapulpitu va, kirowaka eliinya ela ya mavekelo, mwa Nsina na Yesu Kristu. Muluku Yoole aakivahale ikhopa iye, Muluku Yoole aanvahale Munna Hattie muthiyana moolumo ale, Muluku Yoole aakilavulihale yaawo, Owo arowe ni miyo. Miyo kinrowa mwa Nsina na Yesu Kristu. [Moolumo kamosa-kamosa a Munna Branham t'orika wiiwa muliinyani mwa mavekelo ninttharelana—Mol.]

226 Satana, miyo kinnoopwapwelani e. . . nyuwo, mwa Nsina na Yesu Kristu, wira mmuhiye mwaan'ola. Mmuhiye, mukhume mwa mwaan'ola; murowe, nto mwaana akhale mukumi.

227 Kinimwiixaatherya matata munn'aka, mwa Nsina na Yesu Kristu, ni opwapwela muxankiho v'erutthuni vawe. Amen.

Mwa Nsina na Yesu Kristu, munvahe yoovekela awe.

228 Pwiya, mwa Nsina na Yesu Kristu, munvahe Munna Ruth ovona wawe. Amen.

229 Kinonvekelela mwaana. Masi ki—kinookhuruwa vapulpitu vale. . . Munkhala woowi? [Munna oniira, "Bloomington."—Mol.] Bloomington, Indiana? Mukilepele ewarakha mwaha wa mwaan'ola. Napwiipwi othene orimwiipa va vano. Munoorowa waamini, muhano, wira ekeekhai? ["Kinnaamini wira Ela ekeekhai."]

230 Vano, Tithi, kinnimwiixaatherya matat'aka va. . . mwaan'ola, ni ompwapwela xetwani ula. Amukhume

mwaan'ola. Ni wira e...?...Wira akhale oolikana vano ni mwaan'ola avonihawe.

Mukilepele ewarakha, muhina mwa mahiku manli.

²³¹ Munnimoona mwaan'ole oovirikana maitho ompaathale vale? Mwaahihoverye-tho, munoomuhokoloxa mwaan'owo mmoonihе wira oolikana ni mukumi.

²³² Kinimwiixaatherya matata munn'ola. Ni wira akhalane mweettelo wa muthiyana a oSirofeniisiya. Ni wira avonihawe mwa Nsina na Yesu Kristu...?...?

Murima okhale mukumi, mwa Nsina na Yesu Kristu.

²³³ Miyo kinlavula moolumo ala. Ohaana okhala mukumi. Khekhanle okhalaka etthu ekina tho. Yesu oohimya, "Miyo kinniweya, mwaaminiki vale." Vano, vakhala wira Owo onniweya okhumeleliha ikhopa ntoko *siisaale*, ntoko Owo aakhumelelinh'awe epwittipwitthi emaara emosa, Owo onniweya wiiriha murim'ole okhala woolikana ni mukumi. Ohaana okhala.

Mwa Nsina na Yesu Kristu, murim'owo okhale mukumi. Munvahe.

²³⁴ Vano, eyo kehiyo yookhweya? Ti yookhweya. Muluku t'owiyeviha, hiyo nininvir'ahu vasulu. Vano mukhale owiyeviha voophiyerya hata muhinuupuwel'anyu tho. Enookhala saana.

²³⁵ Pwiya, munn'ihu akhale mukumi, mwa Nsina na Yesu Kristu. Amen. Munna...?...?

²³⁶ Pwiya, vano miyo koohimya moolumo ala, vaxariya-vo ntoko kinwery'aka ohimya ohoolo w'athu. Miyo kahaaleela, "Mwiirela mwaak'ola, 'Wiiphele-vo,' muhihoveryaka, munimwaakhela ehimaly'anyu." Mwa Nsina na Yesu Kristu, muxankiho ola okumihiwe, ni mikattyamiho sothene sirin'anyu. Muhihoverye vano. Mukhale vakhiviru-xa ni Yoowo vano.

²³⁷ Pwiya, kinnimwiixaatherya matata mwaamukhaani ula ohinreere onwerya muru. Mwa Nsina na Yesu Kristu, avonihawe. Amen.

²³⁸ Pwiya, mwa Nsina na Yesu Kristu, mwaak'ola omukhume, avonihawe. Munn'ihu vano akhale mukumi...?...?.. Amen.

²³⁹ Oohiwa ni oohilavula; oohiwa oohilavula. Pwiya, mwa Nsina na Yesu Kristu! Miyo kinnivenya n'ulaleya nihiku ti nihiku, ni mwaakha ti mwaakha, nkinatoko woona waamini onoorwa wookwannanyi Nyuwo, ekumi aka yothene, khuhikhala etthu yaakhumelenle! Vano, owo t'ottiyana naaru, ni oophuleya napwiiipwi. Avonihawe, mwa Nsina na Yesu Kristu. Amen.

Vano, muhihoverye.

²⁴⁰ Pwiya, Nyuwo munnisuwela mixankiho s'erutthu ila. Ni matata mwa yoola, ni murima wa xariya, mmuhiye avonihawe, mwa Nsina na Yesu Kristu. Amen.

241 Okhwa onkhala mukhora mmosa, waamini ole woottharelana. Muluku, mpirikixe nluku vano muhiye waamini okuxe. Kankuru omuhiye, mwa Nsina na Yesu Kristu.

242 Pwiya, ola avonihiwe. Kinnimwiixaatherya matata. Mutthaka nlelo onooruma muxirini. Mwa Nsina na Yesu Kristu, ola avonihiwe.

243 Muluku Tithi, kinnimwiixaatherya matata munn'aka. Ekhale siiso, Pwiya, Eroho Anyu ni owerya, onvahe yoovekela awe. Ekhale siiso, mwa Nsina na Yesu Kristu. Amen.

Yoomalihiwa. Muhihoverye vano.

244 Pwiya, yoothuna ya munn'ihu orwa Ohoolo Wanyu, ni mukhalel'ola orin'awe. Vano, mwa Nsina na Yesu Kristu, akhalane ele envekel'awe. Amen.

245 Etthu xeeni yuulupale! Eroho Yowarya enrweele mwaan'ola, wa ovuwa wa Muluku wira emuruuhe mpakha va yayawe...?... Mwaha w'Omwene wa Muluku, owo aakhele. Amen.

246 Tithi, mwa Nsina na Yesu Kristu, ekhale siiso, wira munn'ihu avonihiwe, ni yoovekela awe avahiwe, mwa Nsina na Yesu. Amen.

247 Yiiriwe. Munimwaakhela Eroho Yowarya. Khiivo enamuna yo wookhottiheryani o...?...Muhaana waakhela! Muhaana waakhela Eyo, okhala wira Muluku ohimnye siiso. Nyuwo mweemererye Yeeyo.

Mpwanyule niwowo nlo naamukhaani vo. Mwiire paahi...?...

248 Tithi a Wirimu, mwa Nsina na Yesu Kristu, munvahe munn'ihu yoovekel'awe. Amen.

249 Tithi, mwa Nsina na Yesu Kristu, munvahe munn'ihu yoovekel'awe. Avonihiwe. Amen.

250 Owo onniwerya okumiherya ikhopa, imaara thanu na piili soottharana. Owo aamunvaha muthiyan'ola etthu p'itthu aarow'awe ovekela; Owo aamoovahani...?...

251 Pwiya, mwa Nsina na Yesu Kristu, munvahe munn'ihu yoovekel'awe. Awo Masu Anyu. Kooxukhuru. Nto avahiwe, Tithi, mwa Yesu Kristu. Amen.

252 Oophentiwa anyu? Tithi, mwa Nsina na Yesu Kristu, mwaavahe ala...?...

253 Pwiya, mwamuthiyan'ola muYuta...Nyuwo mwa Muluku a Abrahamu. Munvahe, mwa Nsina na Yesu Kristu, yoovekel'awe. Ekhale siiso!

254 Mwa Nsina na Yesu Kristu, Muluku a Wirimu, munvahe yoovekel'awe. Amen.

255 Mwaaruusi ula. Murwaaka vaplataforma vale, Muluku aakileela sothene sa makhalelo anyu. Owo onookumiha oviruwa iwo mwa nyuwo.

256 Pwiya, miyo kinnipwapwela oviruwa mwa mwaaruusi ula. Omuhiye okathi ula n'uwo akhume va ootteeliwa murima saana. Enookhala, mwa Nsina na Yesu Kristu.

257 Muluku a Wirimu, Yoole mmuhimuxale Mwan'Inyu, Yesu, mwa ohihimuwa hiyo onthapel'ahu, wira ola atthapele vaalupalexa olelo . . . ? . . . Mwa Nsina na Yesu. Amen.

258 Mwa Nsina na Yesu Kristu, Mwaana a Muluku, kinimwiixaatherya matata munn'aka, kivekelaka wira avonihawe vano mwa Nsina na Yesu.

259 Mwa Nsina na Pwiya Yesu Kristu, Mwaana a Muluku, munn'ihu avonihawe. Amen. Khenwerya omuvara. Ehaana omukhuma. Rowakani, ela ehaana okhuma.

260 Pwiya, mwa Nsina na Yesu Kristu, munn'ihu avonihawe. Amen. Mwa Nsina na Yesu Kristu, kinninvonihwa ola, munn'aka. Amen.

Mwa Nsina na Yesu Kristu, kinninvonihwa munn'aka. Amen.

Mwa Nsina na Yesu Kristu, kinninvonihwa munn'aka.

Mwa Nsina na Yesu Kristu, kinninvonihwa ola, munn'aka.

Mwa Nsina na Yesu Kristu, kinninvaha yoovekel'awe. Amen.

261 Pwiya, mwa Nsina na Yesu Kristu, kinninvaha mai ula yoovekel'awe.

Mwa Nsina na Yesu Kristu, kinninvaha yoovekel'awe, Pwiya.

Pwiya, mwa Nsina na Yesu Kristu, kinninvaha yoovekel'awe.

262 Satana, kinniwoomolani. Mwa Nsina na Yesu Kristu, mmuhiye muthiyan'ola.

263 Mwaahithukiwa okathi munci-ene. Mootaphuwa vano. Munoorowa okhala saana. Enookhala saana vano, nto. Mwaamini vano.

264 Muluku, mwa Nsina na Yesu Kristu, kinninvaha munn'ola, orakanle, ovona wawe. Amen.

265 Mwa Nsina na Yesu Kristu, kinninvaha munn'ola ovona wawe. Amen.

266 Mwa Nsina na Yesu Kristu, munna, kinnoovahani ovona wanyu. Amen. Ekhale siiso!

267 Kimmuroromela Muluku nkinivonya. Munvahe ela, ni waamini. Ekhale siiso!

268 Munnaamini wira Muluku onnoovahani ikuru wira sivonihe eretta ya murima nave? Munnimwaamini wahal'ole kimanly'aka

omuhimya? Ni murima wothene? Vano kinnoovahani ovona wanyu. Mwa Nsina na Yesu Kristu, kinnoovahani ovona wanyu.

269 Nsina nawe muthiyana'ola ti pani omanle orowa ottuli nno? Munkhala mutheerye yoola nipuro nlo? [Munna oniira, "Ayo."—Mol.] Muupuwele wira moovonihiwa! Eyo ekeekhahi ntoko seemenly'aka va.

270 Tithi mwa Nsina na Yesu Kristu, munvahe ola, kinnivekela, ovonihiwa wawe. Amen.

271 Tithi, mwa Nsina na Yesu Kristu, ola aakhele ovonihiwa wawe. Amen!

272 Miyo—miyo—miyo kinnooromolani . . . miyo—miyo—miyo . . . Ni mahala a Muluku, mwa yoovaha ya eMuluku, Kinnoovahani ovona wanyu! Kinnimoomola xetwani uwo, nave.

273 Munnaamini Munna Rose? O Pwiya, Mpattuxa erimu ni vathi, munvahe Munn'ola Rose Austin ovonihiwa nno, Pwiya, mwa Nsina na Yesu Kristu. Amen. Ti yeeyo, Munna Rose, murowe mwaaminiki vano.

274 Pwiya, munvahe munn'ihu ovonihiwa wawe, mwa Nsina na Yesu Kristu. Amen . . . ? . . .

275 Munnaamini yeeyo? Munnaamini yothene ya yeeyo. Vano kinnoovahani, mwa Nsina na Yesu, yoovekel'anyu. Muluku onoomukhalaha mukumi.

276 Ekhale siiso, Pwiya, wira munn'awe avonihiwe, erutthu ni murohoni, mwa Nsina na Yesu Kristu. Amen!

Ola okhale p'ukathi wo . . . ? . . .

277 Pwiya, kinnimwiixaatherya matata, okathi ory'awe oohiroromela, wa mameetiku wala khula ovona onikhuma mwa siyensiya a mameetiku. Masi woohikhala okumana ni Kristu ohihimunwe. Mwa Nsina na Yesu, avonihiwe. Amen.

[Munna Branham onlavula ni munna mmosa muthiyana—Mol.] . . . ? . . .

278 Pwiya, munvahe munn'ihu, kiwiriyanaka saana yoovekel'awe, kiwehexexaka khula nuulumo ohimaly'awe. Ela mwaha wa Omwene. Kinvekela wira Nyuwo munvahe, mwa Nsina na Yesu. Amen.

[Munna mmosa muthiyana onlavula ni Munna Branham—Mol.] . . . ? . . .

279 Pwiya, ntoko murumeyi Anyu, kimwiiwaka mai ule onimunlela mwan'awe, kinnimpwapwela xetwani ula iirale yeela.

280 Nto mwaha wo wooniherya waamini wa muthiyana, kinnimoomola xetwani ula. Khamunrowa owerya omurakaliha mwaan'ola. Avonihiwe mwa Nsina na Yesu. Amen.

Owo onoovonihiwa, munna. Muhihoverye tu, hata vakhani. Muluku ooreeriheni, munna. Owo ti mwan'inyu? Aakhele Eroho Yowarya!

²⁸¹ Muhimuroihe mwaana owo hata nipuro ni omwiiwa minuutu vakhani paahi. Kookupali wira yoomukhumelela etthu mwaan'owo. Munimwaakhela. Munnaamini yeeyo?

²⁸² Mwa Nsina na Yesu Kristu munn'ihu aakhele ovonihiwa wawe.

²⁸³ Pwiya, Owerya wa Muluku Oowerya sothene opwapwele muxankiho wa erutthu ila, ni omusarihe Eroho Yowarya. Ela ti ewoora n'ukathi. Mwa Nsina na Yesu, kinninvaha. Amen.

²⁸⁴ Esuukhiri yoomala. Muhaakhela Eroho Yowarya. Munihaawa okhuma liini...?...Makhalelo anyu othene. Munnaamini wira Kristu onimookhalihani saana ni wookumihani moxankani mu; wookhalihani oolikana?

²⁸⁵ Mwan'inyu? Nna—nnawu nanyu. Murwiiye meekh'inyu? Kaakhalanne, kaa—kaakhalanne ikuru mwa miyo, moone! Masi kinnaamini wira Muluku onookikhaliherya okhalana waamini wa yeeyo. Kinimwiira sothene sinwery'aka. Munnikaamini? Munnimwaamini wahal'ole a ikhopa iye? Munnaamini? Munnaamini wira enniweryaneya, wira voosiis'ula, wira Muluku aamuwerya ovoniha erutthu anyu, ni nyuwo weetta-tho, weetta ntoko saatthuney'aya emaara yoopacerya? Yookhala etthu ekhumelenle mooyariwani wanyu vo, yookhala etthu ekhottihenrye etthu vakhani ni nyuwo khamunnunwe oratteene. Ntoko epantte ya erutthu eninnuwa vasulu va epantte ekina, enoovaralela. Ahe, epantt'ile yakhuma-ru epantt'ile, enimookoleleya ekhale saana. Munnona? Eyo ekeekhahi? Eyo etakhaleliwo. Eyo etakhaleliwo. Vaweryaneya etakhaleliwo eyo okhuma, vano munookhala mukumi. Munnona?

²⁸⁶ Pwiya, kinnuupuwela, ankhil ula aari mwan'aka, ankhil ula aari muhim'aka? Ni waamini, kinnikumihha etakhaleliwo, mwa Nsina Yesu Kristu. Amen.

²⁸⁷ Pwiya, kinnimwiixaatherya matata n'uvekela ovonihiwa wawe, mwa Nsina na Yesu Kristu. Amen.

²⁸⁸ Muluku Tithi, mwa Nsina na Yesu Kristu, kinnimwiixatherya matata muthiyan'ola onihaawa, wira avonihiwe. Amen.

Munna Nash, Muluku aahiwoopolani kankuru, miyaakha vakhani sivinre.

²⁸⁹ Pwiya, munvahe Munna Nash yoovekel'awe. Ntoko murumeyi Anyu, kinnivekela. Enimwiiriwa. Iwo ti waakhula waya, Munna Nash.

Mwa Nsina na Yesu Kristu, munvahe munn'ihu yoovekel'awe. Amen.

290 [Munna mmosa mulopwana ni muthiyana anlavulasa ni Munna Branham—Mol.] Kooxukhuru, munna, mutthikele w'atthu anyu yaari iwe. Muluku oovaheni. Okathi wooreerexa, atthu anyu yaathukumann'aya okathi waary'aka weiwo. Nyuwo mwaari oBombayi okathi waary'ahu wuuwu? Ahe, nto munnaamini itthu iya miyo. . . . siiwaly'anyu?

291 Pwiya, okathi ontthikel'awe w'atthu awe epantte ekina y'ephareya, orowe asarihiwe-ene Owerya wa Muluku, oovonihiwa mwa khula yoovekela owo onvekel'awe. Owo arowe ni aakhele, mwa Nsina na Yesu Kristu. Amen.

292 Mwa Nsina na Yesu Kristu, Mwaana a Muluku, munn'ihu aakhele yoovekel'awe.

293 Pwiya, munvahe yoovekela ya munn'ihu. Mukattiyamiho awe omalihiwe naanaano va, ni ohihimuwa mwa Yesu Kristu. Amen. Munna, ehaana okhala, ehaana okhala tu!

294 [Munna mmosa muthiyana onlavula ni Munna Branham—Mol.] Muntthuna ela etthikeliwe mwa Ehapari yooreera? ["Ayo."]

295 Pwiya Muluku, siiso mwaamuthiyan'ola eemenly'awe va, woohikhala ni mawoko ookhala nanrima. Owo oninvekelela murokor'awe, orina eretta mphomeni mw'awe. Kinninvaha yoovekel'awe. Ni orummwa ovahiw'aka ni Nlaikha; ni ni yoowoona ya Yesu Kristu, isumana vakhani sivinre, musaala mwaka; kinninvaha mwaaruusi ula yoovekel'awe. Amen.

296 Ehaana okhala. Munkhala vakhiviru va? [Munna muthiyana oniira, "Memphis, Tennessee."—Mol.] Memphis, Tennessee. Mukilepele ewarakha. Nyuwo—nyuwo—nyuwo munimwaakhela yoovekel'anyu.

297 Munna Grimsley. [Munn'owo onlavula ni Munna Branham—Mol.] Muluku ooreeriheni, Munna Grimsley.

298 Pwiya, ninniwerya wuupuwela moota orakammy'aya onkhum'awe munn'ola, ni moowiixani opharuliw'awe-mo. Owo ontthunaxa Eroho Anyu, Pwiya. Ela miyo kinninvaha, mwa Nsina na Yesu Kristu. Woonaka miteko sawe s'ottuli, wira owo oophavela woottharani Nyuwo, vano, ni Owerya wa—wa orummwa ovahiw'aka ni Yesu Kristu, woolipiheriwa ni Nlaikha ni yoowoona, kinninvaha Munna Grimsley yoothun'awe. Mmusarihe waamini, nto onookhalana weetta wa vakhiviru.

299 Ankhi koohimenryeni wira, rowakani mukhale mukumi, mwaha wa Omwene wa Muluku? Munnaamini ele ehimaly'aka sa ikhopa iye ni ale, ni munnaamini wira eyo ekeekhai? Vano, Owo, Owo onnikivaha ele enihimeery'aka "mwaak'ola." . . . ? . . . Khamunrowa okhalana mukina. Khamunrowa okhalana mukina. Khenrowa-tho okhala eretta, oowanli munookhala, akumi.

300 Miyo kinninvaha yoovekela ela owo onvekel'awe, wa yoowo, mwa Nsina na Yesu Kristu. Amen.

301 Muluku Tithi, munvahe ela, munn'ihu, yoovekel'awe, mwa Nsina na Yesu Kristu. Amen.

Yoolikana, munna, rowakani, mwaamini.

302 Tithi, sinvir'awe muthiyan'ola, kinvekela wira Nyuwo munvahe yoovekel'awe, mwa Nsina na Yesu Kristu. Amen.

303 Mwa Nsina na Yesu Kristu, kinninvaha muthiyan'ola yoovekel'awe. Amen. Muhihoverye.

304 [Munna mmosa muthiyana onlavula ni Munna Branham—Mol.] Munnaamini wira munoorowa waakhela? ["Ayo."] Vano kinnoovahani yoovekel'anyu, mwa Owerya ovahiw'aka mwa okiruma wa Yesu Kristu, ni okhalenle onamoona...?... Rowakani, ni—ni Muluku onookhala ni nyuwo.

305 Munna Fred, exeeni eri vamurimani vanyu? [Munna Sothmann onlavula ni Munna Branham—Mol.] Munna Freddie Sothmann, kinnipwapwela yoohapala eyo mw'erutthuni mwanyu. Yoohiyeni, mwa Nsina na Yesu Kristu. Amen.

306 Munna Collins. [Munna Collins onvaanela ni Munna Branham—Mol.]

307 Pwiya, munn'ola ooreerexa omphavela opatiiso wa Eroho Yowarya. Pwiya, ni sothene siri mwa miyo, miyo kinnimuhimerya Eparakh'ela Munn'aka Collins. Munvahe. Eroho Yowarya emurweele, ni owo akhale oosareya Eroho Yowarya! Amen.

308 Munna Collins, muhaana waakhela, Eyo enoomala-ru orwa. Muluku onooneehererya paahi.

309 Pwiya, munvahe yoovekel'awe. Wira owo oorumeeleni, ni etthoko awe yoorumeeleni, ni murim'aya wothene.

310 Muluku, munvahe munn'ihu yoovekel'awe. Wa sothene owo ovekenly'awe, aakhele, mwa Yesu Kristu Pwiya'ahu. Amen.

311 Pwiya, munvahe munn'ola ikuru wira akhaliherye ekerej'awe. Ela evaheriwe. Miyo kinninvaha ikuru iya, mwa Yesu Kristu. Amen.

312 [Munna mmosa muthiyana onlavula ni Munna Branham—Mol.] Munna, eyo etthu yowoopiha murin'anyu, oviruwa. Munnaamini wira enrow'aka wooleelani ekeekhai? ["Ayo, kinnaamini."] Munnaamini yeeyo vano, wira miyo—miyo koohimenryeni ekeekhai? ["Ayo."] Vano kinnoovahani ovona wanyu, mwa Nsina na Yesu Kristu. Voolikana ntoko seemenly'aka vapulpitu, oviruwa wanyu ohookhumani.

313 [Munna mmosa mulopwana onlavula ni Munna Branham—Mol.]...?... Eyo ennikhumela, mwa nyuwo othene.

314 Pwiya Muluku, wa mwamunn'aka ooreerexa va, mowiixani ni muhina mwa erooho awe eniihana ntoko yowiixa yiihanaka

Yowiixa. Owo ontthuna Eroho Yowarya. Owo onnittittimihaka muteko Anyu, Pwiya, mwa khula enamuna owo aawery'awe. Ni Owerya wa Eroho Yowarya, Eyo emurweele munn'aka, ni asarihiwe Owerya wa Muluku ni mahala, Eroho Yowarya. Mmwaakhele, kinvahereryaka wa . . .



*MU*ROWE, *MWAAHIMEERYE* EMK60-0417M
(Go, Tell)

ETTHERANELO YA MUTTHAKA WA PAASIKHA

Mutthak'ola wa Munna William Marrion Branham, opaceryawene olaleeriwe ni Enkelesi voosiisu w'Ettiminku ya Paasikha, mahiku yeetaka 17 mweeri wa Abril, 1960, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org